





進宴儀軌卷之一目錄

睿疏

附庭奏

詔勅

令教

筵說

入對筵說

樂章

致詞

睿製詩

附廣進

儀註

進宴儀軌卷之一

睿疏

附庭奏

皇太子上疏

庚子五月二十三日

皇太子

誠惶誠恐稽首頓首謹再拜上言于

統天隆

運肇極敦倫正聖光義明功大德堯峻舜徽禹謨湯敬應
命立紀至化神烈巍勳洪業啓基宣曆皇帝陛下伏以今
年卽我 父皇陛下寶齡將躋五旬之慶年也凡爲臣子
而遭遇是慶不世而有焉幸而遭遇其願欲賁飾而識喜
者果何如哉雖日日而進豐亨豫大之舉夫豈足以略伸
歡欣忭祝之忱矣昨年之冬今歲之首疏籲而奏請者亦
至於煩且瀆矣而迄未蒙允俞之音小子之齋菀悶隘已
無所控告而至如今日之言又有間於前日之懇今年

萬壽聖節乃慶年之慶節也稽于祖宗已行之例不啻有可援而可徵者粵我純祖朝有將躋四旬洽滿四旬飾喜稱觴之儀兩殿之慶比歲後先朝廷耆舊尚有及見傳以爲昭世盛事竊惟今年之慶自有當行之禮無待於小子之請而雖以我父皇陛下崇儉謙挹之大德亦不可使國家彝典有闕今年亦我母后陛下恰滿五旬之慶年而瞻望景孝之殿無由得舞斑彩而供歡愉小子今日之私豈有其旣而其欲備物盡禮慶我父皇陛下今年之慶善頌善禱於萬有千歲無疆之寶籙受天申休益迓景命者又豈有其旣哉而惟我母后陛下之靈宜亦悅也興慨有竢於今年而其將悅豫於呼嵩擎斗之日宜其若身親見之矣小子不忍畢其辭而父皇陛下

下念到于此其亦惻然有思矣跨歲申請者反覆覲縷爲
屢數千言而 聖批有曰今時則非然又有曰先其所不
急後其所可急者小子竊有惑焉苟有可急於國計民事
者則可以捐其所不必急者以先其可急此謂汗漫不切
於時者耳若以國家不世遭遇之大慶歸之不急則未敢
知何件事又有重且大而急於此者矣茲敢申前請而復
此陳籲伏願 陛下特賜開允 聖節日陳賀內外進饌
之節令掌禮院依已例磨鍊仰體 祖宗之懿規俯愜臣
子之情理焉無任攢頌顯祝之至

答曰省疏具悉爾懇跨歲申請反覆覲縷者忱誠之切摯
典式之率由朕非不諒而方財絀民困艱虞溢目萬機叢
脞惟日不給乃爲此雍容閒暇之事於朕心其可安乎凡

事求安於心而已所以孝莫大於養志爾其勿復煩請以
安朕心仍 詔曰 皇太子疏批秘書卿持傳

皇太子再疏

庚子五月
二十三日

皇太子

誠惶誠恐稽首頓首謹再拜上言于

統天隆

運肇極敦倫正聖光義明功大德堯峻舜徽禹謨湯敬應
命立紀至化神烈巍勳洪業啓基宣曆皇帝陛下伏以今
者之籲非小子之言乃 祖宗之彝典也又有至切之情
理庶幾有以感格聰聽者而及伏奉 聖批靳俞小子徊
徨抑塞復不省何以爲辭矣竊以昨年冬與今年歲首之
請遇慶年而飾慶於慶年也既未克獲准小子歉歎忱誠
之未至國家當行之禮以之未行 父皇陛下聖德謙冲
固欽仰攢頌而小大臣庶其將謂小子爲何如人也今者

之請所請之事一與前同而所遇之慶與前日所言者尤
迥有別焉今之所遇乃慶年之慶節也洵慶萃集慶豈有
大於是者乎惟我 父皇陛下神文聖武功業巍蕩大德
必得天申用休祈永年於萬億無疆將進之慶如川之方
至日之升月之恆未有窮既而惟是將躋五旬慶年之
萬壽聖節在於今年萬億年而不可再遇小子所稱慶豈
有大於是者此也有慶必稱有國不易之規而此謂凡慶
皆然况其罕有而疊臻匝域含生之倫加額而望賁飾
舉者哉小子又于是而不得准請焉則又將謂何如人而
其於國家之禮將何哉茲敢冒悚煩陳伏願 陛下亟降
允許以副臣庶之顙祝焉無任區區懇迫之至
答曰省疏具悉爾懇前此數示不止數四亦既罄佈無餘

宜其有諒會而乃復申復有若不可遂已焉者豈其必有是舉而後為可歟朕未知其可矣然而其言情理處朕不無默然以思者勉許所請諸般儀物一從省略無煩民力無違朕志可也仍 詔曰 皇太子疏批秘書卿持傳

皇太子疏 辛丑五月 初一日

皇太子 誠惶誠恐稽首頓首謹再拜上言于 統天隆

運肇極敦倫正聖光義明功大德堯峻舜徽禹謨湯敬應命立紀至化神烈巍勳洪業啓基宣曆皇帝陛下伏以昨年惟我 父皇陛下聖壽將躋五旬之慶年也今年惟我 父皇陛下聖壽恰滿五旬之慶年也連年之慶會洊臻每歲之應行典禮爰有 祖宗朝金石不易之規小子之苦懇積以歲月累牘連章殆至屢數千言此非小子一人之

言也乃匝域臣民大同之言而 聖批靳俞只令今年月
正元日進致詞舉賀儀是豈足以賁飾大慶少伸小子之
情禮哉夫 上天之篤棐而眷佑綏之以多福申之以永
命以啓萬億無疆之休者必待乎聖人作而樹立宏大有
功德於天下國家而後有焉稽之遑牒蓋不世而遭逢惟
我 父皇陛下運撫中恢肇建大業巍蕩盛烈光前裕後
實有邁於勗垂溯考三代以降未或有媿隆焉天之所報
者宜其如此而如日之升月之恆如川之方至奇祥異瑞
諸福之應湊集而駢臻凡爲臣子歡祝之忱夫豈有其極
而苟非有寓之於物而著之於形聲焉則亦無以輸寫其
歡祝之忱矣是以豐豫而陳之歌詠而道之萬舞而暢之
小大臣鄰飽之以大饌醉之以大酒使之欣欣抃蹈於鍾

鼓箎絃之音協氣懽聲洋溢區宇達于上下仰以悅豫
祖宗在天之靈俯以和樂黎庶環海之濱又有以導迎
而召致之此讌饗之禮所由始而有國之所重也自古在
昔未嘗有遇有慶而廢其禮近而我家禮又班班可攷矣
父皇陛下雖欲固讓彝典不可越也天心不可違也臣民
之願不可遏也且連年之慶迄有未稱焉者而今年聖
節又慶年之慶節也慶會之萃集未有如今年者則其在
小子知年愛日之誠其欲圖效於萬一者其果何如哉惟
我父皇陛下孝理之政大而無外品物之衆無不各遂
其性者小子今日之至願宜有以體察之矣茲敢復申前
請於閱歲屢懇之餘伏願父皇陛下淵然三思勉回謙
衷流虹之月內外進宴之儀亟下成命俾典憲罔缺輿情

獲伸焉無任攢手祈祝之至

荅曰省疏具悉爾懇爾之連年爲懇者旣屢矣而朕之爲諭者亦屢矣意其將順朕志遂姑已之何爲而又有此申提也非爾之所宜如此非朕之所圖者也飾慶之舉其在又安閑暇之日亦爲張大矧於此時而違可擬議乎無待多誥其庶諒會勿復以是爲煩仍 詔曰 皇太子疏批秘書卿持傳

皇太子再疏

辛丑五月初一日

皇太子 誠惶誠恐稽首頓首謹再拜上言于 統天隆

運肇極敦倫正聖光義明功大德堯峻舜徽禹謨湯敬應命立紀至化神烈巍勳洪業啓基宣曆皇帝陛下伏以小子無似忱誠淺薄不能仰格崇高文字短拙未得導達志

意連年屢懇之餘又復冒徹而 聖批一向靳許豈徒小子抑塞徊徨靡所容措已也大小臣民之俛俛失望齋苑而莫之因極者大可見矣有國之爲慶而可以稱述焉者功德瑞應吉祥之事名號不一而慶莫大於慶 聖人之壽惟 天惟 祖宗所以眷顧鷲佑於 聖君列辟之有大勳於國家子孫萬世之業者必降以永年福祿壽考臣子之所願于上者亦惟是而已是以我 列聖朝慶 聖壽之典禮尤重未或有遇是而無有稱焉惟我 父皇陛下今年 聖壽適符於義易大衍之數萬有千歲無疆之寶筭實兆於今年伊始今年之慶最莫大焉遇茲千載罕有萬歲將進之慶年 列聖朝相承已行之彝典未必有行焉則其在我 父皇陛下克儉克讓之 聖德固爲欽

頌讚嘆而洪範曰龜從筮從卿士從庶民從是之謂大同
是可以見人主亦有所不得獨行其志者矣今小子之請
乃大同之願也 父皇陛下其亦宜有以不得不從者矣
小子亦不敢以將順爲事憚於瀆屑而遂止不言矣環東
土芸芸蒼生其將胥謂小子盍亟請而格回 聖衷焉則
小子無所逃其責矣小子悶迫之私又有未可以文字言
語形容者矣茲敢冒陳切迫之懇伏願 父皇陛下劃准
小子之請亟降俞音上答天慶下從人心焉無任懇迫祈
祝之至

答曰省疏具悉爾懇前後之批夫豈出於修飾揖遜而乃
此頻復張皇有若固請而不止者然甚未可知也 祖宗
之禮卽三代之禮也有時而行有時而未必行亦所以損

益之義也朕非不嘉乃忱誠所言者亦或其然而其時則不可矣一直苦懇致煩酬應其於養志之道果何如也爾其諒之勿爲更提仍 詔曰 皇太子疏批秘書卿持傳

皇太子率百官庭請奏辭

辛丑五月
初一日

皇太子 率百官庭請奏曰伏以小子之今者疏懇亦既至於再矣申複之言輸寫肝膈無敢有隱而 聖衷莫回微忱莫徹小子菀結燥悶益不省攸處矣夫天之所與堯舜之聖焉而不爲辭焉惟我 父皇陛下媿隆唐虞功有過焉天之所報與者宜其昌大悠久萬有千歲方進未已之福祿壽考 父皇陛下其將無以辭焉而今年之慶父皇陛下皆受而享之者也國家當行之懿典臣民顯祝之至願亦無以辭之者矣三代之時周之禮樂最爲彬彬

而獻壽宴饗之禮尤爲極備行葦之肆筵設席旣醉之籩
豆靜嘉豳風之躋彼公堂稱彼兕觥者是耳下之頌禱於
上者皆願其未來之福於將來而人主未嘗辭而不受今
年之禮所以讚頌我 父皇陛下已有之福祿壽考而又
所以祝願將來必然之理必至之事如響之應聲影之隨
形者此其爲禮古所未有也臣子之願欲賁飾遭遇之慶
會頌禱無窮之福祿壽考者其果何如哉小子之洞屬蚤
夜寸草報暉之忱有未暇言而億兆臣庶之加額而望焉
者必未可以抑遏之矣茲率百官又此仰請期於獲准乃
止伏願 父皇陛下俯垂察焉亟降俞音俾允愜於天理
人情之際焉千萬顯祝

答曰知道有慶而無稱焉慶固自如今時則不可焉亦豈

無時朕所以屢靳爾請者也其必有心喻意會者而至有
此張大之舉愈不知止其可乎爾之誠孝殊為嘉尚而朕
志已定矣所請不允爾其諒之

皇太子率百官庭請再奏

辛丑五月初二日

皇太子率百官庭請再奏曰伏以小子比歲屢懇者皆

為今年之慶也往時輒未蒙允竊請尚有來年積誠而懇

庶幾格回天心而今則聖節只隔一月其情也迫故其

言也切焦苑之至偕我盈庭百僚以其僉同之言為請而

又不賜許可小子於是而徊徨罔措實不知所出矣第伏

念小子及廷紳之言 陛下欲抑而沮之孰敢曰不可而

小子及廷紳之所藉恃而申請謂我 父皇陛下亦有所

不得不從者乃 祖宗典憲也 父皇陛下亦苟欲謙讓

未遑焉則亦孰敢曰不可而典憲者萬世不易之彝章也
非徒爲率由於前亦所以垂示於後也若使當行而必不
可缺者一有所未行焉則將爲口實後未必有行焉而
祖宗典憲遂以有闕矣 父皇陛下其或念到於此其必
有怵然而省不待小子之申複矣閭巷匹庶亦皆能爲其
父母慶其壽而飾其喜速諸姻婭朋舊而樂之無是焉不
足爲子職俚俗亦然况有國之大慶而究未有稱焉小子
其敢曰能爲子職而將何以謝百官萬民哉伏願 父皇
陛下俯賜體恤劃准小子之請亟下成命千萬顯祝
答曰知道朕豈不諒於爾之情理亦豈不念到於 祖宗
典憲而亦有所不必然者在廷老成之見宜其有默識者
而又復如是頻煩良非所圖也且日熱方甚露庭可憫其

進寧傳 卷一
亟止之以安朕心

皇太子率百官庭請三奏

辛丑五月初二日

皇太子率百官庭請三奏曰伏以小子以疏以奏既屢瀆矣忱誠未格俞音尚靳踟高踏厚益無所容措矣小子之於子職曷嘗有絲毫稱塞而愛日之誠日深一日知年之喜年加一年所萬一之報答者惟祈祝 聖壽無疆耳猗我 父皇陛下巍蕩 聖德非小子所敢讚述而歷觀前世英君哲辟相望於史策若夫以繼體守文之主建勳業垂統之基惟 父皇陛下有之天眷 聖德 寶筭彌加迨茲今歲之慶是誠國朝之所罕有也雖月以進豐亨豫大日以陳呼嵩擎斗未足以少伸塵露之忱而凡係儀文應行之典謙而不有小子之齋菹缺望顧何如哉日夜

之所顯竦者擬於萬壽聖節粗伸歡祝之忱今焉是節將屆矣夫人子之於其親有慶識喜恆性同然相在小人尚有洗腆之養小子忝居儲貳遇是年是日之慶不能舉國家煌煌令典闕其所不敢闕隳其所不可隳則其於子職何羣情何亦於邦禮何哉竊伏覩 父皇陛下 一政令一施措動遵 先憲今此盛儀卽我 祖宗所已行之禮則亦豈非 陛下所當監法者乎衷情益激冒悚洊籲伏願 父皇陛下淵然三思勉回謙抑之衷亟許進宴之儀以副至祝焉

答曰知道飾喜者暇豫之事也今虞憂瀕洞財益窘絀民益困瘁朕方中昃勤孜遑可議及於此而爾之一直苦懇不已忱誠之篤摯亦有所可念者盈庭之論惟以此事爲

急於此時者甚未可知也屢回商量不得已勉許諸般儀
物務從省略無令煩費庶可以少安於朕心矣爾其諒之
詔勅

庚子五月二十四日

詔曰以 東宮誠孝疏請進饌至再不已朕雖嘉其誠
允其請顧今晷乾日甚憂慮多端每念民情錦玉靡安豐
亨豫大今非其時不可以已許而旋寢爲嫌進饌儀節其
令置之

辛丑五月初二日

掌禮院卿臣金聲根謹奏因 皇太子庭請 批旨內
外進宴之節纔已蒙允矣進宴吉日以何間推擇乎敢
奏奉 旨陰曆七月念後擇入

掌禮院卿臣金聲根謹奏以進宴吉日何間推擇取稟
奏本 批旨陰曆七月念後擇入事命下矣內外進宴
當爲分日設行故今日官金東杓推擇則外進宴陰曆
七月二十六日內進宴同月二十七日爲吉云以此日
定行乎敢奏奉 旨以此日定行

掌禮院卿臣金聲根謹奏進宴吉日纔已推擇奏下矣
進宴廳堂上郎廳令宮內府卽速差出以爲舉行之地
何如謹上奏奉 旨依奏監造官以郎廳差出

詔曰命宮內府特進官閔泳徽議政府贊政金聲根李址
鎔爲進宴廳堂上

度支部主事李圭白英親王府典衛安必璠內部主事
徐丙炎通信院主事李範信典膳司主事徐相璟度支

部主事尹泰吉掌禮院教坊司主事林健相議政府主

事尹迥求命進宴廳郎廳

宮內府
舉行

辛丑五月十一日

詔曰今此進宴之節嘉乃東宮苦懇之不已忱誠之肫篤雖已勉從諸般儀節務從省略以體朕念國計恤民事之至意

詔曰進宴廳堂上典膳司提調來待
詔曰進宴廳堂上典膳司提調入侍

辛丑七月二十三日

口傳下教曰今番外進宴時元帥府各隊領尉官兵丁及警部官吏以下犒饋自典膳司措備

口傳下教曰今番外進宴時侍衛陪衛軍兵等令各其處

辛丑七月二十九日

詔曰今番飾慶之舉亶由於東宮誠孝之篤摯朕心嘉悅不可無示意進宴廳堂上以下進爵宰臣以下依例書奏

詔曰進宴時春桂坊以下別單書入

詔曰進宴時承史以下別單書入

詔曰內進宴時第三爵英王垠厩馬鞍具一匹面給第四爵延原郡夫人第五爵貞敬夫人徐氏第六爵貞敬夫人郭氏各白紬三疋白木五疋令宮內府輸送第七爵宗親班首完平君李昇應內下大豹皮一令賜給

辛丑八月初一日

口傳下教曰楔屏依壬辰年例爲之儀軌廳處所掌禮院

爲之物力令度支部限一千元區劃如或不足隨所入加
劃員役則會同日量宜酌定事分付

辛丑八月初八日

詔曰宮內府特進官閔泳徽議政府贊政金聲根尹定求
李址鎔并進宴儀軌廳堂上差下度支部主事李圭白英
親王府典衛安必璫內部主事徐丙炎通信院主事李範
信典膳司主事徐相璟度支部主事尹泰吉教坊司主事
林健相議政府主事尹迥求并郎廳差下

口傳下教曰掌禮院主事朴鏞夔六品趙錫晉儀軌廳看
役差下舉行事分付

辛丑九月十五日

詔曰堂上宮內府特進官閔泳徽議政府贊政金聲根李

詔曰堂上宮內府特進官閔泳徽議政府贊政金聲根李
址鎔各廐馬一匹面給郎廳度支部主事李圭白英親王
府典衛安必瑤內部主事徐丙炎通信院主事李範信太
僕司主事徐相璟度支部主事尹泰吉教坊司主事林健
相議政府主事尹迥求并守令首先調用別看役從二品
崔鶴圭會計院檢查課長吳顯耆內部版籍局長李海晶
內部叅書官李海鵬并守令待窠調用內藏院莊園課長
朴昌善陞一等前議官朴大鏞內部叅書官吳求烈并守
令待窠調用中樞院議官嚴柱源正三品李根永并加資
典膳司檢舉提調尹定求加資監造官主事尹夔燮守令
首先調用熟設所主事朴溥瑗李膺植并陞叙別看役漢
城郵遞司長尹奎燮度支部財務官張浩鎮正三品金信

默洪正燮安秉祐金漢翊內部技師崔浩英奎章閣主事
吳仁善并守令待窠調用從三品李淑六品李兌燦并加
資監官六品姜昌欽金鍾澄李範用九品李鍾郁文惠教
金宗九金道春趙明濂李時昌并守令調用儀註書寫禮
式院主事全光默李熙圭軍部主事金漢朝各兒馬一匹
賜給六品鄭光鎬洪忠鉉并加資五品姜德喜九品安壽
南金榮鎬鄭漢永權龍圭畫員六品徐元熙全修默各兒
馬一匹賜給金衡植加資擇日官金東杓相當職調用寫
字官六品咸健永任信鎬池相獻朱興泰裴東燦李圭三
金殷權金相悅并加資畫員九品金龜濟陞六其餘牌將
員役工匠女伶等并依判下施賞

詔曰議政府議政沈舜澤宮內府特進官趙秉世領敦寧

內府特進官閔泳徽農工部大臣金奎弘議政府贊政
金聲根內部大臣李乾夏各熟馬一匹面給爵卓官太僕
司主事李鎬漵英親王府典衛李世永法部主事金商直
度支部主事崔炳吉李命植申聖秀分花官農商工部主
事朴熙陽法部主事柳遠聲各兒馬一匹賜給

詔曰檢舉提調尹定求加資進止提調尹定求副提調李
軒卿各熟馬一匹面給監造官主事尹夔燮熟設所主事
朴溥瑗李膺植并陞叙別看役漢城郵遞司長尹奎燮度
支部財務官張浩鎮正三品金信默洪正燮安秉祐金漢
翊內部技師崔浩英并守令待窠調用從三品李淑加資
奎章閣主事吳仁善守令待窠調用六品李兌燮加資監
官六品姜昌欽金鍾澧李範用并守令待窠調用九品李

鍾郁文憲教并陞六金宗九金道春趙明濂李時昌并守
令調用牌將飯監并相當職調用其餘巡檢員役樂工并
依判下施賞

詔曰兼掌禮秘書院丞尹忠求半熟馬一匹賜給秘書院
卿趙同熙丞李種完尹喬榮尹鎮佑洪鍾宇郎柳寅哲權
永昇李義國安弼鎬各兒馬一匹賜給教坊司提調閔泳
徽風物監造提調閔泳徽各熟馬一匹面給協律郎鄭光
杓掌禮院左掌禮金錫龍右掌禮趙鎮高贊儀申奎善主
事黃義喆金龍圭柳基馨李纘鎬崔奎源李兌斗權鍾國
各兒馬一匹賜給尙衣司提調李址鎔熟馬一匹面給長
金有濟主事朴璟夏羅在珉李承周朴基澤前主事奉常
司主事郭昌鉉兼任主事內藏院主事金格莊園課主事

鄭俊東各兒馬一匹賜給營繕司主事崔元章朴鳳陽并
陞叙吳駿根陞六陸軍叅領李根馨李昌九叅尉梁柱興
李愚誠并加資叅校吳順奎鄭元植姜壽興副校金錫柱
元帥府副校李吉用陞差其餘員役等并依判下施賞

詔曰詹事閔衡植半熟馬一匹面給副詹事趙東完侍讀
官申憲均徐丙贊李相高宋觀憲侍從官鄭寅獻趙重觀
任軒宰李甲承李丙瓚洪蘭裕李澤鍾掌禮院相禮申憲
均掌儀李昌善主事黃義喆金龍圭各兒馬一匹賜給掌
務員二人掌禮院雇員四人拔例施賞其餘員役并依判
下施賞

詔曰今番賞典中一人雖兼數事毋得疊授

令教

庚子五月二十二日

令曰議政率禮堂明日來待

庚子五月二十三日

宮內府奏本議政率禮堂來待矣奉 旨入對宮內大臣
同爲入對

辛丑五月初一日

令曰時原任大臣率禮堂來待

宮內府奏本議政率禮堂來待矣奉 旨入對宮內大臣
同爲入對

令曰當率百官庭請矣

令曰日已向晚明日當更爲庭籲矣

辛丑五月十一日

令曰進宴廳堂上典膳司提調入對

辛丑六月二十二日

口傳下令曰內進宴時侍座排設以平排設爲之排設中褥屬袱屬以黃紅色仍用饌案依前例令尙方措備侍座既以平座磨鍊平床交椅蓋覆紅氈寶床香座兒爐烟床并置之便次排設令扈衛隊舉行事分付

口傳下令曰內進宴時前用諸呈才唱詞肄習與船遊樂諸具及各呈才肄習服色量宜磨鍊令教坊司舉行待令巡檢及巡牢食價依他都監例從略上下畫龍燭依內下燭樣以木物造成插心紅燭以用而心燭以五色造用事分付

辛丑六月二十三日

令曰進宴廳堂上來待

令曰進宴廳堂上入對

口傳下令曰內進宴時 太子宮侍座排設以簾外爲之

前導以下各差備等舉行之節成笏記肄習事分付

口傳下令曰內進宴時翌日會酌儀節依壬辰年例磨鍊

命婦及進宴廳堂郎致詞令本廳製進排設以交椅舉行

先後唱樂章當撰下矣令女伶肄習所進饌品及命婦以

下進宴廳堂郎別看役以下床排盤只量宜磨鍊事分付

口傳下令曰翌日會酌夜讌儀節叅互壬辰年例磨鍊進

宴廳堂郎致詞亦令本廳製進座堂儀仗置之事分付

口傳下令曰內進宴正日內外賓頒花唱名記自本廳修

正以入勅任官問安進字舉案自議政府宮內府捧納本

廳事知委舉行而首拱花令該次知牌將率花匠頒給散
花十朶具曲釘等待內賓床入傳時舉行女伶預先量宜
分定饌品重湯處所以凝春門外設油遮日等待而饌品
預先入設饌品排設圖及饌品單子夜進宴及翌日會酌
班次圖并修正以入夜進宴及翌日會酌與夜讌時進湯
進茶加磨鍊會酌時味數一味七器爲之紗燈籠左右或
懸或豎外賓在外人自本廳知委在京人一體知委事分

付

頌花唱名記作笏記二件以諺書列書參宴
內外賓長職啣○饌品單子式見饌品條

口傳下令曰內進宴時下典女伶以各宮婢子舉行事分
付

口傳下令曰內進宴時本廳堂上郎廳亦依外賓例入叅
行禮事分付

口傳下令曰內進宴時第五爵左命婦班首進上第六爵右命婦班首進上第七爵宗親班首進上

辛丑七月初七日

口傳下令曰內進宴時左命婦班首以貞敬夫人徐氏右命婦班首以貞敬夫人郭氏爲之頒花唱名記并爲修正以入事分付

口傳下令曰永平君李景應完平君李昇應完順君李載完清安君李載純禮陽令李載規贊政李址鎔尙州郡守李載現九品李坡鎔李達鎔幼學李達鎔李海忠學部大臣閔泳韶從一品李憲植農商工部大臣金奎弘內部大臣李乾夏特進官金奭鎮摠裁官趙東冕判敦寧院事洪淳馨特進官尹用求正二品李承純從二品金錫圭金用

圭特進官金定圭 景孝殿提調閔泳璘正三品李貞烈

吳錫泳吳明根副尉金重圭副詹事趙東完龍仁郡守金

寧漢六品李源培九品洪奎植吳昌根李稷烈侍從官李

甲承九品俞弘濬金翼鎮李源應幼學俞熙濬金暘漢今

番內進宴時入叅事分付

口傳下令曰熟設所自今日始役而郎廳以下輪回入直

處所禮式院爲之堂上則臨時入直事分付自是日郎廳二員別看役一員牌將

一人書題一人庫直使令各一名旗手二名使喚一名省記一件修呈宮內府入奏一件修呈侍講院入啓

辛丑七月二十三日

口傳下令曰今番外進宴時侍衛陪衛軍兵等犒饋物種

當內下矣使之頒給事自本廳分付

辛丑七月二十六日

口傳下令曰今日外進宴時進爵大臣宰臣春桂坊政府
叅政贊政叅贊閣臣府部協辦以上議長判尹玉堂雲寶
劍承史賡進

口傳下令曰內進宴正時以辰初初刻爲之事分付

辛丑七月二十七日

口傳下令曰今日當賜饌頒花矣問安後時原任大臣議
政府宮內府勅任官以上承史閣臣春桂坊玉堂并畱待
之意令宮內府知委

口傳下令曰內進宴時春桂坊進宴廳堂郎賡進

辛丑七月二十八日

口傳下令曰明日會酌時宮內大臣協辦政府叅政贊政
叅贊元帥府摠長時任閣臣承史入直玉堂入叅

口傳下令曰明日會酌時春桂坊入叅

口傳下令曰明日會酌時依正日例辰初初刻爲之事分付

辛丑七月二十九日

令曰進宴廳堂上以下書啓以入

令曰內進宴時第三爵英王垠內下大豹皮一令賜給第四爵延原郡夫人第五爵貞敬夫人徐氏第六爵貞敬夫人郭氏各白紬三疋白木五疋令宮內府輸送宗親班首完平君李昇應內下大豹皮一令賜給

辛丑八月初六日

口傳下令曰今日再會酌時春桂坊在院承史入直閣臣玉堂入叅

辛丑九月十五日

令曰堂上宮內府特進官閔泳徽議政府贊政金聲根李址鎔各內下豹皮一令賜給郎廳度支部主事李圭白英親王府典衛安必瑬內部主事徐丙炎通信院主事李範信太僕司主事徐相璟度支部主事尹泰吉教坊司主事林健相議政府主事尹迥求各內下表裏一次賜給別看役從二品崔鶴圭會計院檢查課長吳顯蒼內部版籍局長李海晶內部叅書官李海鵬內藏院莊園課長朴昌善前議官朴大鏞中樞院議官嚴柱源內部叅書官吳永烈正三品李根永各內下表裏一次賜給典膳司檢舉提調尹定求內下豹皮一令賜給監造官主事尹夔燮熟設所主事朴溥瑗李膺植各內下表裏一次賜給別看役漢城

郵遞司長尹奎燮度支部財務官張浩鎮正三品金信默
洪正燮安秉祐金漢翊內部技師崔浩英從三品李淑奎
章閣主事吳仁善六品李兌燦各內下衣資一次賜給教
坊司提調閔泳徽內下豹皮一令賜給主事鄭光杓內下
鹿皮一令賜給營繕司長閔康鎬主事崔元章朴鳳陽吳
駿根各內下表裏一次賜給其餘監官日官畫員寫字官
奏時官牌將巡檢員役樂工工匠女伶等并依判下施賞
令曰議政府議政沈舜澤宮內府特進官趙秉世領敦寧
院事尹容善完平君李昇應各內下大豹皮一令賜給宮
內府特進官閔泳徽內下豹皮一令賜給農商工部大臣
金奎弘議政府贊政金聲根內部大臣李乾夏各內下虎
皮一令賜給爵卓官太僕司主事李鎬漢英親王府典衛

李世永法部主事金商直度支部主事崔炳吉李命植申
聖秀分花官農商工部主事朴熙陽法部主事柳遠聲各
內下獐皮一令賜給

令曰檢舉提調尹定求內下豹皮一令賜給進止提調尹
定求副提調李軒卿各內下虎皮一令賜給監造官主事
尹夔燮熟設所主事朴溥瑗李膺植各內下表裏一次賜
給別看役漢城郵遞司長尹奎燮度支部財務官張浩鎮
正三品金信默洪正燮安秉祐金漢翊內部技師崔浩英
從三品李淑奎章閣主事吳仁善六品李兌燮各內下衣
資一次賜給教坊司提調閔泳徽內下豹皮一令賜給協
律郎鄭光杓內下表裏一次賜給尙衣司提調李址鎔內
下虎皮一令賜給長金有濟內下鹿皮一令賜給主事朴

璟夏羅在珉李承周朴基澤前主事奉常司主事郭昌鉉
兼任主事內藏院主事金格內藏院莊園課主事鄭俊東
各內下獐皮一令賜給禮貌官掌禮院主事李纘鎬柳基
馨各內下表裏一次賜給把門侍衛陸軍叅領李根馨李
昌九叅尉梁柱興李愚誠各內下衣資一次賜給其餘監
官畫員寫字官奏時官牌將巡檢員役樂工工匠等并依
判下施賞

壬寅三月初十日

令曰進宴儀軌修正依乙卯整理儀軌例爲之 大殿一
件奉入內入七件又內入二十件西庫三件奎章閣侍講
院秘書院四處史庫掌禮院各藏一件事分付

筵說

辛丑五月初一日

上御咸寧殿議政率禮堂請對入侍時 上曰卿等因何
事請對乎議政尹容善曰 東宮殿下以 皇上陛下聖
壽洽滿五旬流虹之節隔在數朔仰請進宴至於疏籲此
誠我朝稀有之慶環東土億萬生靈無不欣欣鼓舞於仁
壽之域况我 東宮殿下出天之孝愛日之誠藹然油然
自有不能已者有足以感動 宸聽以 陛下至仁至慈
之心豈忍不爲之嘉悅而曲從乎上焉而遵 先之盛禮
不可不行下焉而由中之 睿孝不可不體若臣等懇迫
之辭祈祝之悃有不敢覩縷煩瀆伏願 陛下深念乎此
則其所俯許必不待臣等之畢辭矣伏願亟回淵衷快賜
俞音俾光 睿孝千萬顙祝 上曰朕之真情已悉於疏

批卿等亦應見之矣顧今民國事計有百可憂豈其豐亨
豫大可議之時乎萬萬不可也容善曰 東宮封章時臣
等獲覩盛舉而 睿孝懇摯每發於辭教之間臣等不勝
欽誦而亟下俞音然後乃有 聖衷嘉悅之本意矣 上
曰 東宮至誠朕豈不諒也但際此時心實有愧無以聽
從也容善曰 睿孝之切至已爲體諒典章之攸在輿情
之齋菹又非不洞燭而猶且靳許者職由乎民國事計乎
今承下教爲民爲國辭旨惻怛 大聖人治道亦不外乎
憂國愛民卽此一念上天所以錫茲祉福者也以羣下之
誠其飾慶之節豈容虛徐而以 陛下繼述之志豈待羣
下強聒之請宜有勉回謙衷亟降明命天聽愈邈俞音尙
靳臣等之抑鬱悶迫當何如哉 上命大臣就座容善曰

未蒙允許之處分旋承退去之下教臣等抑苑姑舍東
宮睿枕果何如耶俄於東宮入對時伏聆懇迫之睿
旨將率百官庭請爲教而臣等以求對力請之意面達矣
今茲前席亦未蒙許可惶悶抑苑不知所以爲計也上
曰以東宮孝心亦必諒朕意之所在也

辛丑五月十一日

上御咸寧殿進宴廳堂上典膳司提調入侍時秘書院丞
李範世秘書院郎柳寅哲權永昇進宴廳堂上宮內府特
進官閔泳徽議政府贊政金聲根李址鎔典膳司提調議
政府贊政尹定求以次進伏訖上曰史官分左右上
曰會同何日爲之乎泳徽曰筵退後卽爲會同矣仍奏曰
內外進宴處所何處磨鍊乎上曰外進宴處所中和殿

爲之內進宴處所咸寧殿爲之址鎔曰中和殿補階當自
營繕司舉行而月臺設平補階則可以容接矣 上曰達
于 東宮舉行可也泳徽曰進宴儀節肄習處所以何處
爲之乎 上曰掌禮院爲之可也泳徽曰會同當於掌禮
院爲之而諸般儀節當以奏本稟定矣 上曰儀節中不
得不奏本者則入奏其他諸事則達于 東宮舉行可也
仍教曰嘉乃 東宮懇懇不已出於誠孝之篤摯雖已勉
從國計民事不可不念已有所詔勅矣諸般儀節務從省
略以安朕心可也泳徽曰旣伏承 詔勅今又承下教謹
當各別董飭舉行矣定求曰進宴時味數與器數何以爲
之乎 上曰達于 東宮舉行可也定求曰監造官例以
本司郎官兼帶舉行今番則何以爲之乎上曰依例爲之

萬而况上奉萬乘之尊獲覩五旬之慶愛之至而頌禱之
不已喜之極而舞蹈之不足以此之慶以此之誠烏可無
文字仰請乎 聖衷雖執謙挹此疏入徹庶有體諒以是
顯祝矣 皇太子出示疏草曰將欲如是陳疏矣容善曰
辭旨懇摯典禮有據期蒙處分爲祝矣 皇太子曰大臣
禮堂權退○上疏承批後更令大臣率禮堂入對 皇太
子曰初疏未承俞音下情悶苑容善曰非但 睿衷之悶
迫臣等益切抑苑矣 皇太子曰卽欲再疏更請矣仍出
示疏草容善曰今番則庶可孚格天聽矣 皇太子曰大
臣禮堂權退○再疏承批後更令大臣率禮堂入對 皇
太子曰再煩疏籲又未蒙允下情轉益悶迫矣容善曰顯
祝之餘又失所圖臣等亦爲萬萬抑苑 睿教至此懇迫

承聆之下不知攸達矣 皇太子曰又爲陳疏極涉支煩
故將欲庭請矣容善曰伏承庭請之教尤不勝悶迫而此
是不得請則不可止之事矣 皇太子曰下情去益燥悶
矣容善曰臣等不勝悶迫之忱方欲仰請于 皇上陛下
面陳 睿衷之懇迫矣 皇太子曰此說甚好矣容善曰
謹當力請俾光 睿孝矣 令曰當率百官庭請矣
皇太子詣中和殿庭率百官庭請奏辭承批後 令曰
手批示于議政仍教曰庭請未蒙準許下情轉益悶迫矣
容善曰臣等亦不勝抑菀矣 皇太子曰日勢已晚今難
更請當於明日更籲矣容善曰明日則期於獲準相顧爲
祝矣 令曰日已向晚明日當更爲庭請矣

辛丑五月初二日

皇太子詣中和殿庭率百官庭請再奏承批後 令曰
手批示于議政仍教曰再奏又未蒙允下情愈往悶迫矣
容善曰 睿誠如是而未承勉從之批臣等亦不勝抑菀
矣 皇太子曰期欲三奏矣容善曰羣情如是悶菀 睿
衷尤當如是更切顓望矣○庭請三奏承批後 令曰
手批示于議政仍教曰今承允從之批下情慶忭矣容善
曰 睿誠仰格獲準所請盈庭百僚舉切懽忭之至霎時
間歡聲協氣洋溢區宇矣 皇太子曰今旣蒙許萬萬慶
幸矣容善曰尤有光於 睿孝而莫非 殿下誠孝之所
由孚格矣

辛丑五月十一日

皇太子座感寧殿進宴廳堂上典膳司提調入對時侍讀

官宋觀憲侍從官鄭寅獻趙東濬進宴廳堂上宮內府特
進官閔泳徽議政府贊政金聲根李址鎔典膳司提調議
政府贊政尹定求以次進伏訖 皇太子曰桂坊分左右
皇太子曰遇茲千載罕有之慶會將進稱觴上壽之宴禮
其所欣欣之忱曷以形喻 皇上雖以撝謙之德務從省
略爲教寔出於恤民之恩念欽仰萬萬而予小子祝岡之
誠實不敢少緩凡係儀文物采以至饌品器用卿等必須
彈誠照檢無或有一毫未盡可也泳徽曰進宴旣伏承成
命實出於 睿孝之篤至萬萬慶祝而謹依下令舉行矣
仍達曰內外進宴處所仰稟于 大朝矣外宴中和殿爲
之內宴咸寧殿爲之事祇承處分矣 皇太子曰唯仍教
曰會同何日爲之乎泳徽曰筵退後卽當會同于掌禮院

矣 皇太子曰凡於儀節謹遵 肅廟 英廟兩聖朝已

例亦參互壬辰年例磨鍊舉行可也泳徽曰謹依下令舉

行而諸般儀節從當入啓矣 皇太子曰法醞饌品床卓

何以爲之乎泳徽曰法醞饌品典膳司舉行而床卓則知

委該司以前排着漆修補精備入排矣 皇太子曰新造

者自本廳造成可也泳徽曰謹當依下令舉行而員役工

匠等料布自本廳磨鍊上下何如 皇太子曰依爲之址

鎔曰中和殿補階舉行何以爲之乎 皇太子曰以平補

階爲之百官則臺下宣醞可也定求曰今番進宴時諸般

舉行稟于 東宮處分之意纔奉 大朝處分矣在前進

宴時例有大卓饌案別行果而器數不同今番則何以爲

之味數與器數亦何以爲之乎 皇太子曰外宴時大卓

饌案別行果器數一依 英廟癸巳年例磨鍊味數九味
每味七器爲之 太子宮饌案別行果各以十五器爲之
味數九味每味七器爲之定求曰進湯進饅頭何以爲之
乎 皇太子曰依例磨鍊定求曰大小膳進鹽水進茶之
節何以爲之乎 皇太子曰依例磨鍊定求曰內進宴時
大卓饌案別行果器數與味數何以爲之乎 皇太子曰
內宴時大卓饌案器數亦依癸巳年例爲之別行果三十
器爲之味數七味每味七器爲之 太子宮饌案置之別
行果二十七器爲之味數三味每味七器爲之 太子妃
宮別行果亦以二十七器爲之可也定求曰進湯進饅頭
何以爲之乎 皇太子曰依例磨鍊定求曰大小膳進鹽
水進茶之節何以爲之乎 皇太子曰依例磨鍊而英親

王延原郡夫人別行果亦以十二器爲之可也定求曰熟設處所以何處爲之乎 皇太子曰中和殿近處爲之定求曰平成門內恐好矣 皇太子曰依爲之仍教曰內外進宴時朝臣床數與器數進宴廳與典膳司叅酌磨鍊可也定求曰筵退後謹當叅考磨鍊而未及稟定之事追當啓達矣 皇太子曰依爲之仍教曰進宴廳堂上與典膳司提調一體往來董飭可也泳徽曰謹依下令舉行矣

辛丑六月二十三日

皇太子座咸寧殿進宴廳堂上入對時侍讀官宋準憲侍從官鄭寅獻李甲承進宴廳堂上宮內府特進官閔泳徽議政府贊政金聲根李址鎔以次進伏訖 皇太子曰桂坊分左右仍教曰進宴日子漸近慶祝萬萬諸般舉行今

至何如耶泳徽曰進宴之日不遠尤切懽祝舉行之節已
爲始役而多有稟定之事矣內進宴時絲圈花以幾枝造
成乎 皇太子曰三枝造入簪花二枝亦爲造入泳徽曰
外進宴時絲圈花以幾枝造成乎 皇太子曰二枝造入
泳徽曰內進宴時儀仗何以磨鍊乎 皇太子曰以法駕
儀仗磨鍊泳徽曰咸寧殿排設以何年例磨鍊乎 皇太
子曰依壬辰年例磨鍊泳徽曰內外進宴班次圖以何年
例爲之乎 皇太子曰內進宴參互壬辰年例爲之外進
宴一依五禮儀參互壬辰年例爲之 皇太子曰內進宴
時第一爵親上第二爵 太子妃宮進上第三爵英王進
上第四爵延原郡夫人進上自第五爵至七爵臨時稟達
舉行泳徽曰謹依令教舉行矣 皇太子曰外進宴時第

一爵親上致詞樂章當親撰以下第二爵致詞令文任製
進泳徽曰謹依令教舉行矣 皇太子曰內進宴時親上
致詞及樂章當親撰以下自第二爵至七爵致詞令奎章
閣學士製進泳徽曰謹依令教舉行矣 皇太子曰外進
宴時依近例當用俗樂矣泳徽曰近年每以俗樂舉行矣
皇太子曰此後當有口傳下令矣如有所達入稟可也泳
徽曰外他儀節臨時謹當稟達矣 皇太子曰唯

樂章

睿製外進宴樂章

瑞日金樓敞華筵慶辰恭遇茲月迭奏咸謦簫箭五雲蓬
闕 帝業隆功配乾行 寶筭天工開物千官拜舞獻霞
觴滿庭花簇簪笏 皇王聖欽對越覽輝光燭地南極星

出鸞鳳麒麟照耀大有世奇祥長發太和釀北斗遙斟萬
年供奉怡悅

萬年懽一疊

睿製內進宴樂章

帝德廣運通駿有聲豐功盛烈巍乎莫名大業重恢神武
用成萬世貽謀鞏奠 宗祏 聖筭無疆天降嘉禎五旬
光躋南極瑞呈日月頌騰區宇懽盈今辰飾喜報暉伸誠
小大同欣環海鏡清簫韶儀鳳歌詠昇平

廣運一章章二十句

睿製內進宴先唱樂章

大衍數無量 寶籙靈長萬年春酒進瓊觴閭闔風來喧
法曲雅樂鏗鏘軟舞賽回雪嬰娜霓裳紅雲一朵捧瑤皇

通宴傳 卷一
花底千官齊拜跪袖惹天香

寶籙一章

睿製內進宴後唱樂章

聖代烟花開壽域休運河清見一星南極十二天門凝瑞
色今辰慶會昇平飾環海蒼生均飽德敦化旁流品物咸
蕃息洋溢懽聲歌 帝力嘉祥天降垂千億

壽域一章

睿製夜進宴先唱樂章

降休祥綏百祿自天申獻八千年以爲春吾 皇萬歲壽
齊箕翼慶長新滿庭簪珮頂華祝七爵恭陳捧堯樽登薰
殿昇平樂賀昌辰舉懽喜小大臣民添籌海屋閭風笙月
醉羣真奏雲門稽首香案莫唱鷄人

金人捧盤露一疊

睿製夜進宴後唱樂章

率彝典誕陳豐豫慶今年恭遇舞蹁躑綵服供懽奉御
爐香炷玉樓金殿靄雲長護大羅天深處夜何其樂未渠
央儘教渾天曙

賀聖朝一疊

睿製翌日會酌先唱樂章

夜仍用

明德崇功天賚遐齡祥光出地南極一星

明德一章章四句

睿製翌日會酌後唱樂章

夜仍用

樂是慶會萬億無疆寸草戀暉願日稱觴

樂是一章章四句

呈才樂章

凡進宴自都監列書各樣呈才入奏受點而今番進宴則因下令磨鍊舉行○外宴則舞童舉行內宴則女妓舉行

鳳來儀

癸巳養老宴時自內製下○女妓二人奉竹竿子前進列立八人分四隊相對以舞○舞童呈才同

念我

祖宗德盛功隆載篤其慶誕膺成命於萬斯年赫

赫昭宣永言嘆嗟惟以遂歌

竹竿子進口號

海東六龍飛莫非天所

扶古聖同符根深之木風亦不抗有灼其華有蕢其實源

遠之水旱亦不渴流斯為川于海必達昔周太王于豳斯

依于豳斯依肇造丕基今我始祖慶興是宅慶興是宅

肇開鴻業

各隊并唱

狄人與處狄人于侵岐山之遷實是天心

野人與處野人不禮德源之徙實是天啓千世默定漢水

之陽累仁開國卜年無疆子子孫孫聖神繩繼敬天勤民

乃益永世嗚呼

嗣王監此洛表遊畋

皇祖其恃

同舞唱詞

獻仙桃

宋時詞曲有仙呂宮王母桃之名麗朝倣作獻仙桃曲以為頌祝之樂戎朝亦用之桃凡三顆以木磨成枝葉以銅鐵為之盛

之銀盤○設戲桃卓於前卓之左右女妓二人分立相向一人奉桃盤而進一人在東一人在西一人在後并北向舞又二人奉竹竿子分立其後○舞童呈才同而竹竿子不呈口號仙母稱奉仙桃盤

邈在鰲臺來朝鳳闕奉千年之美實呈萬祿之休祥敢冒

宸顏翌日會酌時以銅闌改書進謹進口號竹竿子進口號昌辰嘉會賞春光盛事當

年憶上陽堯顙喜瞻天北極舜衣深拱殿中央翌日會酌時以壽曜煌煌天北

極華樽灑灑殿中央改書進浩蕩歌騰祝和氣氤氳袖拖香改書進壯觀太平何以報蟠桃一朵獻千祥獻仙桃致詞

日暖風和春更遲是太平時我從蓬島整容姿來降賀丹

墀仙母與左右挾并唱東風報暖到頭嘉氣漸融怡巍峨鳳闕起鰲山

萬仞爭聳雲涯梨園弟子齊奏新曲半是壘篴見滿筵簪

花外宴時以簪紳改書進醉飽頌鹿鳴詩左右挾并唱海東今日太平天喜望

龍雲翌日會酌時以瑤宮改書進慶會筵尾扇初開明黼座翌日會酌時以移淑景改書進畫簾

三十一

辛丑卷一樂章

高捲罩祥烟梯航交湊端門外玉帛森羅殿陛前妾獻外

時以拜獻改書進皇齡翌日會酌時以寶齡改書進千萬歲封人何更祝遐年仙母歛

霞裾而小退指雲路而言旋再拜階前相將好去竹竿子退口號

帝壽昌已丑 容製○圖書集成宋基聖節排當樂次奏夾鍾第二蓋笛起帝壽昌慢○女妓二人奉竹竿子一人奉簇子前進列立

四人分二行四方立一人在中一人奉黃蓋隨後又四人在其後列立并北向而舞○舞童呈才同而竹竿子不呈口號仙母稱中舞

帝德協和方見河清之美 聖壽遐邵普切山呼之忱敢

冒宸顏庸陳口號竹竿子進口號帝壽昌賀 聖明也洪惟我

陛下德耀寰表如天之統物如地之載物熙融乎春臺玉

燭以萬壽無疆俾爾熾昌歌之頌禱也仙母致語惟邦籙之靈

長兮慶百世而綿綿傳子及孫兮彌于億千彰 聖德之

光明兮瞻化日之高懸帝膺壽以昌兮景福圓全俾延吉

祥兮其臻如川臣拜稽首兮 天子萬年帝壽昌詞在右挾并唱 天子

萬年兮介爾昭明昭明有融兮環海永清嘉樂吉慶兮協

氣懽聲詒謨燕翼兮享斯太平天子萬年詞各隊并唱奏九曲而告成

祈萬齡而有永幸值昇平之會用伸懽忭之誠拜辭華筵

式燕譽處竹竿子退口號

金尺太祖在潛邸時夢有神人授金尺世宗朝做象為舞英祖丙戌進宴時御製維皇詞聖人詞尺刻天賜金尺受命之祥八字

又用生絹作簾子書維皇詞上下粧以紅白綾垂流蘇掛於朱漆竿○女妓二人奉竹竿子一人奉篋子前進列立一人奉金尺一人奉黃蓋在後

序立十二人分左右作二行進退回舞○舞童呈才同而竹竿子不呈口號仙母稱奉金尺

奉貞符之靈異美盛德之形容冀借優容式孚宴譽竹竿子進口號

夢金尺受命之祥也 太祖潛邸夢受金尺漢陽開國聖

神休德于今幾百於千萬億奉金尺致語惟皇鑑之孔明兮吉夢

協于金尺清者耄矣兮直其鷺繫有德焉是適仙母與各除并唱帝

用度吾心兮俾均齊于家國貞哉厥符兮受命之祥傳子

及孫兮彌于千億各隊并唱聖人有作萬物皆觀靈瑞繽紛諸

福畢至長言不足式歌且舞於樂於倫 君王萬壽仙母與各隊并

唱樂既奏於九成壽庸獻於萬歲未及懽娛之極遽回敬

戒之心拜辭而歸式燕以處竹竿子退口號

壽延長宋時樂譜有仙呂宮延壽樂又有長壽樂用於慶節上壽麗朝作壽延長樂四隊并立循環而舞我朝宴禮亦用之○女妓二人奉竹竿子前進相向八人分二行作四隊相對而舞○舞童呈才同而竹竿子不呈口號

對而舞○舞童呈才同而竹竿子不呈口號

壽星耀彩映八窓馥郁雲霞近寶幢玉帛車書寰海謐梨

園樂部奏中腔竹竿子進口號祥雲瑞日色相縈 御座中天簇簪

纓翌日會酌時以天保騰頌簇簪纓改書進萬花舖錦凝仙露慶敞需宴懽聲各隊并唱

千齡啓統樂功成恭將海籌齊手擎羣英濟濟來賓筵長

如今賀昇平各隊并唱青春玉殿和風細奏簫韶皦繹舞袖行

雲飄飄曳捧璫樽流霞艷溢丹宸儼臨敷仁惠翌日會酌時以式極儼臨敷仁

式極儼臨敷仁

惠改書進

廣布

聖德震陬澐

翌日會酌時以四重歌聲遍陬澐改書進

醉飽欣欣相告

仰瞻斯讌千萬歲

各隊并唱

太平時節好風光殿宇深深日正

長

御苑花香薰綺席天將美祿泛金觴

竹竿子退口號

響鈴

戊申御製○唐時燕樂法曲有銅鈸相和之樂我朝鄉樂倣用之又以金鈴十枚分絡左右手隨拍并轉有聲名曰響鈴○女妓

一人在前一人在後又四人作二隊在其後各繫鈴於左右手指并北向隨樂節搖響而舞○舞童呈才同

玉殿瑤宮奏管絃列神仙鳳衫麟帶拖香烟舞翩翩惟願

從今

君王

翌日夜讌時以青宮改書進

壽永齊天春風澹蕩百花前萬年

年

務頭并唱

花暖瑤池敞繡屏迥聞鸞吹下青冥飛瓊試舞新

翻曲連理雙環百子鈴

中拍并唱

紫袖金鈴赴節催回風吹雪

錦筵開翔隨彩鳳乘雲至并學神鰲駕海來拍裏萱芽呈

北極曲中蘭葉長南陵

青宮更作斑衣舞歲歲親擎

來讌時以恭擎改書進

萬歲杯

尾後并唱

建寧義軌

辛丑卷一樂章

寶相舞

戊子 睿製○洪苑珠村緊陀羅王屯崙摩彈琴歌以諸法寶相讚佛大迦葉等皆作舞圖書集成唐樂志曰漢有槃舞晉

世謂之杯盤舞○設寶相盤盤中置蓮花缸女妓一人奉花立於盤之東一人奉筆立於盤之西六人分三隊前隊二人各執彩球舞而俯投缸如

拋球樂形中隊後隊隨前隊舞退次次進舞

翠幕華筵耀瑞日綺羅三隊好新粧各隊五雲樓閣聞仙

樂百寶闌干拂霓裳第一隊左錦帳初開彩袖色玉簾且捲

繡毬香第二隊左花間簫鼓莫催曲只恐花身落舞場第三隊

佳人剪牧丹巳丑 睿製○淵鑑類函宋樂舞十隊四曰佳人剪牧丹表紅生色砌衣戴金鳳冠剪牧丹花○設牧丹花樽

於盤女妓十人環立於樽邊各取樽花一枝進退旋轉而舞○舞童呈才同而八人

萬朶先開照殿紅姚黃魏紫妬玲瓏新翻玉笛清平樂別

樣仙香撲蝶風并

六花隊樂學軌範多誤字甲午自內釐正○女妓二人奉竹竿子前進列立六人分三隊一人在中隨樂節相變而舞○舞童呈才同

新花在手逞綽約之春光寶帶團腰學六宮之粧束幸預

在庭之樂願陳詣闕之由竹竿子進口號顧慚微品願助陳歡金縷

聲催凝行雲而可駐華茵影過知回雪之將飄未敢自專

伏候 宸旨花心致語折得慙懃色正新嬌紅嫩綠露初均休

言能解應傾國高壓香城艷占春左第一人唱詞艷香暗消錦色新

谷園初折一枝均盈盈不慣梅花發半倚樓臺笑早春右第

一人唱詞 海棠花發錦江新宮女紅粧醉未均不放東君容易

去一枝湏折蜀州春左第二人唱詞玉容淡佇對佳新輕折枝枝傳

粉均素色最宜明月下何須紅粧壓芳春右第二人唱詞金刀初剪

露痕新輕疊羅黃密綴均碧玉枝頭開遍到裊嬈偏稱上

都春左第三人唱詞小桃破萼錦鮮新迎日夭夭美艷均青帝施工

偏着意一枝先折滿城春右第三人唱詞嫩綠嬌紅共爭妍於麗景

清歌妙舞俱效技於華筵雅音垂成拜辭而退

竹竿子退口號

萬壽舞

戊子 睿製○宋周密天樂次諸部合萬壽無疆薄媚曲破四書集成明永樂脩食樂章一奏上萬壽之曲○設桃卓女妓一人奉桃盤而進一人奉篋子隨後四人分二行北向而舞如獻仙桃儀○各隊并唱真諺相雜故不載○舞童呈才同而仙母稱奉仙桃盤

禁苑和風拂翠箔袞衣深拱繡龍文

翌日夜燕時以法筵淑氣更氤氳致書進

天門

彩仗映祥旭萊闕仙朝開霽雲金殿堯樽傾北斗玉樓舜

樂動南薰

翌日夜燕時以瑤陛奉觴瓊液滿玉樓奏樂瑞烟薰改書進

海東今日昇平世萬歲千

秋奉

聖君

翌日夜燕時以歌頌羣情胥告欣改書進○奉簇子唱詞

瑤階蟠桃結三千春色

滿玉盤中三千春為

君王

翌日夜燕時以殿下改書進

壽瑞日紅

仙母唱詞

獻天花

戊子 睿製○佩文韻府維摩詰室一天女以天花散圖書集成宋樂舞小兒隊十八日菩薩獻香花○設獻花卓女妓二人

執幢東西分立一人奉花瓶而進二人在後北向而舞

祥雲繞金殿天花奉玉瓶翠華聞仙樂冠珮會如星

仙母與左右挾

并

演百福之舞

已丑 睿製仙母致語前段後段丁亥改製○女妓二人奉竹竿子東西分立四人在後一行立一人隨其後

并北向相變而舞○舞童呈才同而竹竿子不呈口號仙母稱中舞

住在大羅天上來朝 聖人宮中演無疆百福之祥呈太

平萬歲之舞敢冒 宸顏 翌日夜讎時以銅闌改書進 庸進口號 竹竿子進口號 欽惟

翌日夜讎時以恭惟改書進 我 聖上 翌日夜讎時以震邸改書進 德化隆盛 翌日夜讎時以德協重華改書進 福

祿無疆享華封 翌日夜讎時以封人改書進 之三祝躋天保之九如茲當慶

會載敝祝嘏以百福長演之曲歌之而頌也 仙母致語 天休啓

我東方仁風和日寶祚靈長朝金門拜玉堂百合香烟九

霞觴鸞鳴和鳳歸昌於萬歲樂未央 前段仙母與左右挾并唱 太平烟月

朝元殿兩行歌舞羅曲讎再拜陳三願一願龜齡鶴壽二

願星輝海潤三願康衢謠擊壤歌羣生老少同懽怵 後段仙母與左

右挾并唱 高懸北斗衆星樞平對南山鎮國維 聖壽 翌日夜讎時以睿

壽改書進無疆亦如此仙桃萬朶復千枝仙母唱詞海東今日太平

天瑞日祥雲耀繡筵瑤池蟠桃王母獻慶春不老八千年

仙母與左右挾并唱聖人應祿兮天長地久寶齡彌高兮一德彌邵

翳金芝兮蔭孔蓋從闈風兮降瓊島覽光耀兮玉墀稽首

獻禎祥兮華筵舞蹈五音紛兮繁會遏雲霄兮縹緲仙母與左右挾

并唱寶箏嬌放中腔曲錦瑟高張入破絃聖化翌日夜燕時以聖世改書進

清平無一事年年歲歲似今年左右挾并唱雅奏既闕仙侶言旋

再拜階前相將好去竹竿子退口號九如頌騰慶太平之有象三山

路返指後期之無窮仙母致語

舞鼓已丑睿製○漢時有鞞舞鞞小鼓也蓋用鼓節為舞麗朝侍中李混得浮查於海上作舞鼓仍為時用鄉樂○女妓四人各執椎

隨樂節擊鼓而舞四人環立於外分作挾舞○舞童呈才同

鏤月為歌扇裁雲作舞衣因風回雪影還似燕雙飛元舞唱詞

寶箏瓊曲羯鼓花奴腔永新歌宛轉蠻舞一雙雙挾舞

疊勝戊子 睿製○女妓一人在前一人
在後二人在左二人在右相變而舞

翠樓春日捲珠簾紫鸞雙飛近畫簷一疊雕欄灼爍百花光

畫院春深十二香二疊春近昭陽殿裏人仙裙風動好輕身

三疊玉樓春月正遲遲碧繡簷前花影移四疊玉礎花甌築歌

臺玳瑁盤中軟舞來五疊春光先到百花樓宮女雙雙弄彩

毬六疊朝日曛曛興慶池梨園弟子奏新詞七疊弟子部中奏

新樂沉香亭上半捲箔八疊妃子春遊臨玉塘梨園新奏荔

芰香九疊羯鼓聲催 御苑花紫衣宮女按琵琶十疊
并唱

長生寶宴之舞已丑 睿製○圖書集成宋基聖節排當樂次第
五蓋笙獨吹小石角長生寶宴樂○女妓二人奉

竹竿子左右分立一人在前一人在中一人在後一人在左一人
在右相變而舞○舞童呈才同而竹竿子不呈口號仙母稱中舞

麗日舒長開盛宴於寶殿祥雲葱籠張勻樂於彤庭敢冒

宸顏謹進口號竹竿子進口號欽惟我 聖上一德克享天心景錄

無疆昇平之樂祝華之宴以長生不老之壽歌之而頌也

仙母 教語 天門海日先紅絳紗玉斧瑞氣怡融承天嘉奏天樂

金鳳銀鵝一叢叢揚蘭茵舞迴波靡靡柳澹澹風前段仙母與左右扶

并 唱 九重春色蟠桃宴羅衫葉葉舞一遍再拜陳三願一願

聖壽無疆二願朝野清晏三願勻天樂老萊衣歲歲年年

此杯獻後段仙母與左右挾并唱 綺席繡筵已呈千般之舞玉管朱絃既

奏九成之曲再拜階前相將好去竹竿子退口號

拋毬樂 宋時女子除舞有拋毬樂隊麗朝以端午節為拋毬樂女妓當殿唱詞我朝宴禮亦倣用之用朱漆木作毬門畫龍鳳飾以絃

緞門上開一孔為風流眼以彩毬仰拋○女妓二人奉竹竿子前進相向

一人奉花立於毬門之東一人奉筆立於毬門之西十二人分六隊前隊

雅樂鏗鏘於麗景妓童部列於香階爭呈綽約之姿共獻

蹁躑之舞冀容入隊以樂以娛竹竿子進口號翡翠簾前拋繡毬窄

羅衫子緊裹頭玉纖外宴時以輕織改書進高指紅絲網贏取筵前第

一籌第一隊左右并唱翠幕華筵拂霓裳綺羅六隊外宴時以嬋妍羣除改書進簇宮

商驀然高柳鶯梭擲髻上新花惹御香翌日會酌時以共拖香改書進○第二隊左右

并唱粉面外宴時以冠玉改書進嬌嬈列兩行歌聲十二外宴時以爭轉改書進遏雲

祥笑回星眼傾簪玳不覺花枝墜舞場第三隊左右并唱五花心裏

角拋毬香腮紅嫩外宴時以和風宮苑改書進柳烟稠清歌疊鼓連催促這

回不讓第三籌第四隊左右并唱簫鼓聲聲苦莫催彩毬高下且徘徊

徊輕拋正透紅門過共獻君王翌日會酌時以青宮改書進萬壽杯第五隊左右并

唱聞道拋毬喜更忙走臨鸞鑑略勻粧輕招羣隊伴紅袖

只有微心管舊香第六隊左右并唱七般妙舞已呈飛燕之奇數曲

清歌且喜貫珠之美五音齊送六律相催再拜階前相將

好去

竹竿子退口號

蓮花臺舞

麗朝有蓮花臺舞用二女童鮮衣幅蔽二蓮花中花垢而後見戴蛤笠著丹衣分兩隊迭舞我朝宴禮亦倣用之○

女妓二人奉竹竿子前進相向兩童
妓在前兩女妓在後各相對而舞

綺席光華卜晝開千般樂事一時來蓮房化出英英態妙

舞妍歌不世才竹竿子進口號住在蓬萊下生蓮藥有感至尊之

德化來呈歌舞之歡娛童妓并唱雅樂將終拜辭華筵仙輶欲

返遙指雲程

竹竿子退口號

慶豐圖

戊子睿製○宋太宗親製大小曲南呂宮十一慶年豐圖書集成明樂章天命有德之舞六奏慶豐年之曲○設獻圖卓女

妓一人奉圖而進五人在後北向而舞○各隊并唱真
諺相雜故不載○舞童呈才同而仙母稱奉慶豐圖

於

皇聖辟丕彰鴻名

翌日夜謙時以四重騰頌八方以貞改善進

普隆一德

翌日夜謙時以協華

一德改書進

克享高名皇矣上帝肇錫休禎厥禎維何嘉禾九莖

綏萬屢豐慶本滋長景雲乘彩瑞日曜光赤圖玄符天福

永昌歌以擊壤齊頌陶唐

翌日夜譙時以拜獻銅闌演以歌章改書進○仙母唱詞

舞山香

已丑 睿製○唐汝南王璵常帶研絹帽打曲上白擗紅權花置之帽簷奏此一 曲圖書集成東坡李陶子詩誰同研光帽一

曲舞山香○設玳瑁盤制如寢床舞妓一人登盤而舞

衆中偏得

君王笑催換香羅窄袖衣遊響新歌鶯囀樹

倚風輕舞拂雲飛

春鶯囀

戊子 睿製○淵鑑類函唐高宗聞鶯聲命樂工白命建寫之○設單席舞妓一人立於席上進退旋轉不離席上而舞

娉婷月下步羅袖舞風輕最愛花前態青春自任情

牙拍

已丑 睿製○睿註原有唱詞而率皆卑俚之方言難以解詞故有是詞而歌之○拍用六板擊之以爲舞節宋時樂舞有牙拍之

名我朝用於鄉樂呈才○舞童二人各執牙拍隨拍聲擊牙拍而舞

百寶香身嫋嫋來輕盈妙舞芙蓉臺十二慢腔動動樂曲

終宛轉拍聲催

并唱

四仙舞

已丑 睿製而唱詞真諺相雜故不載○新羅時有永郎述郎安祥南石行俱遨遊山水號爲四仙金剛有舞仙臺俗傳四人

醉舞於此○女妓二人各執蓮花一枝在前作一隊四人在後作二隊并北向而舞○舞童呈才同

船遊樂

設彩船諸妓分立為行船樣曳纜繞船而舞世傳自新羅時有之○兩童妓登船分立於帆前帆後女妓二人戴朱豸插羽著天翼佩劍弓矢列立於船前作號令執事舞妓六人分立於船邊左右各執船索作內舞三十四人環立作外舞聽令行船并唱漁父詞而回舞○

歌詞真諺相雜故不載

無旱舞

女妓二人執葫蘆相對相背而舞後隊十人隨其樂節相變而舞○唱詞則真諺相雜故不載

初舞

此以下只呈才而不呈唱詞故不載○周禮樂師掌教小舞劉濂謂初學舞者二佾可也樂記發揚蹈厲之已蚤何也初舞時即手足發揚蹈地而猛厲圖書集成明朱載堉舞譜春牘圖轉初勢蹈放字象惻隱之仁是為第一春○兩舞童北向換手加額而舞

劍器舞

雜舞曲云中舞也項莊舞劍項伯以袖隔之若語莊云公莫後為劍舞又稱劍器舞鄉樂用之○女妓四人戴戰笠著戰服各持二劍分二隊相對而舞

致詞

鶴舞 用竹為兩鶴以青黃羽衣之兩舞童藏其中回翔而舞承開蓮筒而退兩童妓出蓮葉以後為蓮花臺舞

睿製咸寧殿外進宴時親上致詞

皇太子 欽遇光武五年辛丑七月二十六日 父皇陛

下黃籤 聖壽五旬義衍數契萬有千年基自今歲忱誠愛日

慶是罕有誕舉儀雙擎北斗百辟卿士趨跲拜舞聲氣
權協洋溢區宇不勝慶忭之至謹上萬萬歲壽

百官致詞

正一品大匡輔國崇祿大夫議政府議政臣沈舜澤等欽

遇光武五年辛丑七月二十六日 統天隆運肇極敦倫

正聖光義明功大德堯峻舜徽禹謨湯敬應命立紀至化

神烈巍勳洪業啓基宣曆皇帝陛下黃籤受天景命 寶筭

五旬運泰 宗社德咸臣民繁祉松茂湊祥川臻賁飾喜

慶 睿孝克伸鳳韶儀舜兕觥躋幽戴花稽首萬年長春

臣等不勝慶忭之至謹上萬萬歲壽

弘文館學士
金聲根製

睿製咸寧殿內進宴時親上致詞

皇太子 欽遇光武五年辛丑七月二十七日 父皇陛下

下 玉液沆瀣仙醞太一玄梨火棗需以嘉實妙舞珊瑚

羽衣芳潔捧獻瑤觴霞旌霓節瑞靄葱龍蓬萊金闕綵服

供懽萬年日月不勝慶忭之至謹上萬萬歲壽

皇太子妃致詞

皇太子妃妾閔氏欽遇光武五年辛丑七月二十七日

父皇陛下黃 運回義衍德協堯治兆民同樂百工允釐通

有駿命誕受鴻禧謙儀載舉以介壽眉東海添筭南極耀

庀長奉萬歲福祿維祺妾不勝慶忭之至謹上萬萬歲壽

奎章閣學士
金聲根製進

英王致詞

英王臣垠欽遇光武五年辛丑七月二十七日 統天隆

運肇極敦倫正聖光義明功大德堯峻舜徽禹謨湯敬應

命立紀至化神烈巍勳洪業啓基宣曆皇帝陛下黃籤寶籌

五旬至仁賊德周顯不謨禹建皇極邦命維新而匡而翼

睿孝克伸讌喜是式花頒百僚頌騰八域此日奉觴於萬

斯億臣不勝慶忭之至謹上萬萬歲壽製上同

延原郡夫人致詞

延原郡夫人妾金氏欽遇光武五年辛丑七月二十七日

統天隆運肇極敦倫正聖光義明功大德堯峻舜徽禹謨

湯敬應命立紀至化神烈巍勳洪業啓基宣曆皇帝陛下

黃籤寶籌五旬至仁賊德周顯不謨禹建皇極邦命維新而

匡而翼 睿孝克伸讌喜是式花頒百僚頌騰八域此日

奉觴於萬斯億妾不勝慶忭之至謹上萬萬歲壽製上同

左命婦致詞

左命婦貞敬夫人妾徐氏等欽遇光武五年辛丑七月二
十七日 統天隆運肇極敦倫正聖光義明功大德堯峻

舜徽禹謨湯敬應命立紀至化神烈巍勳洪業啓基宣曆
皇帝陛下黃籤寶籌五旬至仁賊德周顯不謨禹建皇極邦

命維新而匡而翼 睿孝克伸讌喜是式花頒百僚頌騰
八域此日奉觴於萬斯億妾等不勝慶忭之至謹上萬萬

歲壽製上同

右命婦致詞

右命婦貞敬夫人妾郭氏等欽遇光武五年辛丑七月二
十七日 統天隆運肇極敦倫正聖光義明功大德堯峻

舜徽禹謨湯敬應命立紀至化神烈巍勳洪業啓基宣曆
皇帝陛下黃籤寶籌五旬至仁賊德周顯丕謨禹建皇極邦
命維新而匡而翼 睿孝克伸讌喜是式花頒百僚頌騰
八域此日奉觴於萬斯億妾等不勝慶忭之至謹上萬萬
歲壽製上同

宗親致詞

正一品上輔國崇祿大夫完平君臣李昇應等欽遇光武
五年辛丑七月二十七日 統天隆運肇極敦倫正聖光
義明功大德堯峻舜徽禹謨湯敬應命立紀至化神烈巍
勳洪業啓基宣曆皇帝陛下黃籤寶籌五旬至仁賊德周顯
丕謨禹建皇極邦命維新而匡而翼 睿孝克伸讌喜是
式花頒百僚頌騰八域此日奉觴於萬斯億臣等不勝慶

忭之至謹上萬萬歲壽製上同

戚臣致詞

從一品崇祿大夫宮內府特進官臣李憲植等欽遇光武
五年辛丑七月二十七日 統天隆運肇極敦倫正聖光

義明功大德堯峻舜徽禹謨湯敬應命立紀至化神烈巍

勳洪業啓基宣曆皇帝陛下黃籤寶籌五旬至仁賊德周顯

丕謨禹建皇極邦命維新而匡而翼 睿孝克伸讌喜是

式花頌百僚頌騰八域此日奉觴於萬斯億臣等不勝慶

忭之至謹上萬萬歲壽製上同

睿製咸寧殿夜進宴時親上致詞

皇太子 欽遇光武五年辛丑七月二十七日 父皇陛

下黃籤弧南有星祥輝拱北萬億無疆八荒壽域瀉入明河

激豔仙爵鳳凰來儀勻天樂作笙管迭奏續呈百劇天地
悠久願如今夕不勝慶忭之至謹上萬萬歲壽

咸寧殿翌日會酌時命婦致詞

命婦貞敬夫人妾徐氏等恭遇光武五年辛丑七月二十
九日 皇太子殿下紅籤聖功配乾申降嘉禎遐祝恭陳萬

歲昇平妾等不勝慶忭之至謹上千千歲壽宮內府特進
官閔泳徽製

進宴廳堂上郎廳致詞

進宴廳堂上正一品輔國崇祿大夫宮內府特進官臣閔
泳徽等恭遇光武五年辛丑七月二十九日 皇太子殿
下紅籤式日擎觴樂是天慶川之方至福祿來并臣等不勝

慶忭之至謹上千千歲壽製上
同

咸寧殿夜讌時進宴廳堂上郎廳致詞

進宴廳堂上正一品輔國崇祿大夫宮內府特進官臣閔

泳徽等恭遇光武五年辛丑七月二十九日 皇太子殿

下紅籤湛湛露斯載歌載詠萬年無疆 天子神聖臣等不

勝慶忭之至謹上千千歲壽製上同

睿製詩附廣進

咸寧殿外進宴日與叅宴諸臣恭述識喜庸寓萬年

祝岡之忱

寶籙義籌慶此辰五旬基本萬斯春廷紳偕與擎遐祝日

月升恆福祿新睿製

萬歲今辰是慶辰上林花木駐長春恭拚 睿藻臣歡

頌 寶籙無疆德日新臣舜澤寶筭五旬稱慶辰九觴齊

獻萬年春白頭更切丹心祝 聖德恆從 聖壽新臣

世陪宴金樓賀慶辰鳳韶九奏獻仙春萬年是月長如

此睿孝根天福日新臣容善南極祥輝拱北辰蟠桃半

醉九重春五旬慶會基千歲邦命維新德又新臣昇應萬

億惟休慶此辰离明彩服報長春瑤觴擎獻南山壽

大德如天化日新臣泳微愛日睿誠慶此辰五旬加頌

萬年春進酌微臣稽首拜仙桃花爛紫雲新臣奎弘五旬

稱慶慶茲辰聖筭遐期萬億春睿孝供歡臣拜手

南山茂栢日維新臣聲根瑤花籌五慶今辰四海同歌萬

歲春大德如天綏福履皇韓日月化中新臣乾夏籌叶義

著慶此辰仙桃長醉九重春雙擎瑤爵祈天壽萬億邦

家第籙新臣衡植五十衍籌樂令辰八千靈樹慶長春臣

隣舉切岡陵祝睿藻煌煌彩墨新臣東完萬壽霞觴祝

慶辰熙熙盡在一團春河清休運重回日 睿藻欣迎

歲籥新臣觀 五紀重回誕 聖辰盈庭稽祝萬千春紫

霞灑灑金尊滿殿角南山碧更新臣相 南極星光繞北

辰遐籌無量住皇春每年稱慶虹流節咸仰東方 睿

孝新臣軒 正當華渚虹流辰瑤宴歡騰八域春 聖壽

五旬今 聖世丹心祝 聖日惟新臣丙 明德巍勳邁

甲辰康衢烟月太平春五旬 聖節騰遐祝 睿孝愈

光慶日新臣憲 東宮孝養慶熙辰天啓靈祥五十春此

日華嵩同祝筭磐安箕壽永年新臣甲 五旬寶曆迓昌

辰敬進瑤觥祝萬春匝域臣民歌 睿孝重光瑞日海

東新臣澤 虹流慶節火流辰 聖壽今回五十春仙女

擎桃來獻賀海籌盈屋復添新臣丙 五旬 聖壽際昌

辰宮讌長留萬歲春擎學龍樓趨鶴駕千官陪列彩花

新臣寅退籌大衍虹流辰壽考休功盡在春 睿藻煌

煌何所祝於千萬億命維新臣重睿孝彌光祝 聖辰

五旬為度度千春臣隣共獻南山壽華渚流虹瑞更新

臣蘭五旬稱慶際昌辰八域歡欣和氣春 睿孝奉觴

遐祝地天休滋至命維新臣礎五旬虹節屆昌辰愛日

睿誠和氣春膳宰周還偏昵近擎樽先頌海籌新臣定

聖壽五旬讌樂辰繡花琪葉不勝春仙娥雙擎蟠桃舞

萬歲遐籌自此新臣容咫尺羣星拱北辰仙花萬朶郁

成春臣民一口岡陵祝像得巍巍帝德新臣在离筵舞

彩宴虹辰花覆千官紫禁春義衍 寶齡從此始籌籌

添萬命維新臣容五旬稀慶屬昌辰 貳極承歡駐萬

春三祝是筵行九爵進豐呈樂樂章新臣淳翼南極星輝

映北辰五旬 聖筭衍義春文明日月重熙運萬億邦

基命益新臣泳晚龜疇燕喜筮良辰 聖壽時回五十春

遐祝共歡今日酒添籌海屋萬年新臣泳詔瑞曜弧南拱

北辰斗罇擎上萬年春恭惟 貳極根天孝益迓休祥

景命新臣泳煥臣民何幸際昌辰鳳曆昇平五十春彩服

稱觴同慶地昭回雲漢 睿章新臣載完稱觴鶴駕奉茲

辰萬壽先祈五十春同賀梯航 皇帝國懸知天命命

維新臣丙爽義衍箕疇湊令辰流虹瑞彩葆長春恭知

睿孝邀天佑 寶筭無疆景錄新臣箕善聖代 皇猷撫

五辰龍樓八彩駐長春年年此日蟠桃進百福如川弗

錄新臣址銘羣生熙洽樂昌辰化日昭回匝域春手捧瑤

觴爭獻祝五旬餘慶萬年新臣齊純五旬瑤筭慶今辰紫

籙仙桃春復春飾喜 离宮誠意藹彤廷物采煥生新

臣泳詰法酒盈盈樂令辰碧花紅穗別般春臣民此日無

窮祝 聖筭同隨寶命新臣載崑咸寧嘉讌際昌辰堯曆

昇平五十春保泰持盈輝 聖德敬祈邦命萬年新臣岐

運聖壽五旬慶賀辰仙桃醉色九重春侍臣拜獻岡陵

祝萬億洪基百祿新臣泳贊睿孝惟光祝慶辰化霑八域

布陽春微臣拜獻九如頌帝業綿長邦籙新臣商鎬海屋

遐籌頌令辰和風吹溢九重春紅雲一朵咸寧殿 睿

藻煌煌彩墨新臣基東五旬 聖節又茲辰讌樂龍樓和

氣春金鏡蟠桃隨次進無疆 寶籙自今新臣漢英聖壽

五旬慶此辰此辰長在萬年春 睿誠識喜臣民樂擎

斗呼嵩福日新

臣根澤

綿祿家邦又慶辰今當

聖壽五

旬春

儲宮誠孝祈遐筭九爵盈盈萬舞新

臣鳳來

靈長

寶籙際昌辰堯日奠階五十春賁飾笙鏞基萬億廷紳

鰲怵賀儀新

臣榮夏

聖壽年年祝此辰五旬稱慶舞長春

頒花賜醞咸寧殿

睿孝彌光景籙新

臣容翊

五十年回

萬壽辰龍樓侍宴慶長春臣僚共賀岡陵祝

聖代前

星瑞耀新

臣嘉鎮

咸寧殿上慶茲辰寶曆光躋五十春

睿孝恭稱

皇帝壽大邦雖舊命維新

臣俊源

萬歲由今

作慶辰瑤池桃熟駐長春臣僚歡樂無疆祝

寶籙綿

綿祿日新

臣周澤

文明鴻運屆今辰

皇化先開壽域春

慶值五旬歌

聖節萬邦欣頌

睿章新

臣相薰

瑞日祥

雲值令辰乾坤長在四時春銀章花彩交相映既醉詩

中頌德新臣承 五十年躋 聖壽辰咸寧殿上住長春

千官齊進岡陵祝萬國同瞻日月新臣海 聖壽無疆賀

慶辰於皇 寶籙萬年春臣民共仰 儲宮孝頌禱聲

中景福新臣鍾 南極祥輝拱北辰吾 皇躋壽五旬春

宮筵讌喜覃恩慶愛日誠深 睿德新臣鳳 無窮 聖

壽肇今辰福祿煌煌玉燭春鰲怵羣僚賡進祝願將此

慶萬年新臣正 祥虹昨繞又昌辰準海宮樽颺萬春百

衍孔蘧兩知歲仙桃長帶天笑新臣光 五旬 聖壽慶

茲辰識喜 東宮萬歲春華祝嵩呼臣庶樂齊明箕斗

瑞漆新臣敏 大闢明堂樂此辰昇平五十我 皇春三

呼萬歲無疆祝誠孝 東宮愛日新臣廷 天啓 儲宮

飾喜辰滿庭花影帶長春願將三祝祝吾 聖松栢南

山瑞色新臣命善龍樓瑞日啓昌辰萬億年基五十春大

德如天其必得我邦雖舊命維新臣周永五旬虹渚祝岡

辰 睿孝重光化域春萬國衣冠同拜稽無疆景錄日

維新臣恒儀南極星躔拱北辰五旬 聖壽萬年春咸寧

寶殿賡歌遍更祝重明瑞日新臣鳳鎬羲衍遐壽誕 聖

辰金杯擎進萬年春臣民齊頌 東宮孝天佑 皇家

景命新臣忠求繼天邦籙屬昌辰 寶筭光躋五十春鼇

抃廷紳齊獻頌宮懸象德樂章新臣同熙無疆 聖壽賀

今辰滿五旬開萬億春 睿孝格天申降福如川方至

慶長新臣鎮姑大邦壽祿肇今辰擎祝南山萬萬春 睿

孝克伸五旬慶雷雲極躍一時新臣種完五旬禱慶際昌

辰恭祝遐籌萬歲春無疆福祿根於德日致天休又日

新臣喬榮稱慶五旬拜北辰上天同德布陽春遂令萬歲

多今日長使臣民獻賀新臣弼鎬聖世生逢是慶辰簪花

趨走九重春萬年恭祝南山壽堯舜君臨德日新臣永昇

聖壽五旬飾慶辰根天 睿孝祝長春微臣陪宴恩尤

感祇願年年頌命新臣義國寶籌彌邵迓昌辰堯莢花開

五十春日月光輪歌 睿孝萬年邦籙命維新臣寅哲

內進宴日奉觴上壽 大朝于咸寧殿與進宴廳堂

郎春桂坊恭述慶喜庸寓萬歲無疆之祝

聖筭齊天帝業光令辰嘉讌祝無疆萬年長願如今日彩

服供懽捧壽觴睿製

飾喜供歡 睿孝光 皇王萬歲壽無疆宮盤香滴仙

桃醉更願年年捧此觴臣泳徽帝德如天四表光數回義

行福無疆年年此日咸寧殿永願呼嵩奉兕觥臣聲根春

臺瑞日協重光壽域歡聲溢四疆簪笏盈庭同賀祝南

山秀色上瑤觴臣址銘玉藻重瞻睿孝光太平萬歲頌

無疆流霞一勺齊天壽拜舞千官共獻觴臣定求慶祝五

旬睿孝光洽熙邦籙自無疆添籌海屋共懽日偕與

宮僚獻九觴臣軒卿玉殿笙歌瑞日光太平天子慶無

疆蒼生看得恩如海輸與春宮獻壽觴臣相璟睿孝根

天日月光令辰獻壽祝無疆添籌述慶咸和樂八域共

懽萬歲觴臣圭白帝德巍巍國有光慶辰先祝壽無疆殊

恩又賜宮中宴遍插瑤花共醉觴臣健相義衍寶籌德

有光臣隣慶祝福無疆宮醞新釀金莖露少海誠深萬

歲觴臣迥求侍宴瑤池勤耿光欣瞻彩舞頌無疆千秋萬

歲今伊始拜獻南山北斗觴臣丙帝業中興德有光

寶齡大衍祿无疆侍臣簇立呼嵩列 睿孝出天稱壽

觴臣範帝業巍巍德有光五旬邦慶錫無疆根天 睿

孝臣民仰擎進咸寧萬歲觴臣泰肇極東方 帝有光

齊天 寶筭壽無疆呼嵩階下臣僚祝此日年年奉此

觴臣必賁飾儀文 睿孝光縣縣 寶籙頌無疆遐籌

海屋今伊始望六明年又獻觴臣淳聖壽彌長 睿孝

光皇韓基命正無疆幸叨雷肆周旋地獲覩良辰捧玉

觴臣衡五紀治功四表光迓休天命頌無疆微臣陪得

鴈趨列拜獻南山萬壽觴臣東帝德文明日月光臣隣

賡載頌無疆拜瞻彩舞供歡地挹彼南山作壽觴臣觀

帝座中央極宿光遍將壽域作封疆蒼生咸仰前星照

北斗年年捧玉觴

臣準

飾慶供歡

睿孝光太平萬歲

頌無疆管絃迭奏瓶花映螭陛呼嵩擎進觴

臣丙

眉壽

吾皇德彌光歡聲喜氣溢環疆宮筵舞彩

儲誠切

但願長擎萬歲觴

臣相

帝德如天四表光定知邦籙啓

無疆微臣更祝

儲宮壽彩服年年捧孝觴

臣丙

五旬

聖壽篤前光萬姓歡欣共此疆螭陛小臣同虎拜春酒

盈盈進瑤觴

臣軒

獲侍邇班瞻耿光融融和氣遍封疆

籌添大衍齊騰頌萬歲千秋捧壽觴

臣蘭

飾慶宮筵

睿孝光南山萬壽頌無疆一團協氣歡聲裏寶座如天

進九觴

臣寅

聖節鴻儀

睿德光誕膺祺福頌無疆宮

臣鼇扞天門下北斗重輝萬壽觴

臣甲

南極煌煌颺瑞

光天休今日頌無疆宮筵舞彩怡愉意歲歲長擎萬壽

觴臣澤 治化洋洋四表光仁風瑞色溢封疆 离筵識

喜兼遐祝擎進金莖萬歲觴臣重

儀註

咸寧殿外進宴儀

前一日主殿司設 御座於咸寧殿北壁南向設寶案於
座前近東香案二於殿外左右又設小次於北階上近北
南向教坊司展軒懸於殿庭設登歌之樂於殿階上俱北
向設協律郎舉麾位於西階上近西東向主殿司設 皇
太子次於致中門外道東近北西向設便次於殿東階上
近東西向其日主殿司設 皇太子座於 御座東南西
向典儀設秘書院丞郎位於殿內東西相向北上設宗親
及文官二品以上位於殿外近東設堂上三品位於二品

以上之後設侍臣堂下三品以下位於堂上官之後近南俱每等異位重行西向北上設武官二品以上位於殿外近西設堂上三品位於二品以上之後設侍臣堂下三品以下位於堂上官之後近南俱每等異位重行東向北上設不陞殿者位於南階上東西百官三品以下位於殿庭東西俱每等異位重行相向北上又設皇太子拜位於殿階上北向宗親及文官一品以下拜位於殿庭道東武官一品以下拜位於道西俱每等異位重行北向階上典儀位於東階上近東西向左右掌禮及階下典儀代致詞官位於東階下近東西向贊儀主事掌禮院臚唱課下同在南差退又贊儀主事位於西階下近西東向俱北上設皇太子致詞案於殿階上近東班首致詞案在其後設門外位如常

典膳司提調設壽酒亭及茶亭於殿內近南北向設坵加爵副提調設皇太子酒亭及茶亭於殿內近東典膳司官設宗親文武二品以上及堂上三品酒卓侍臣堂下三品以下酒卓不陞殿者酒卓百官三品以下酒卓於每品之前鼓初嚴侍從院勒諸衛陳鹵簿儀仗於正階及殿庭東西列軍士並如式太僕司官陳輿輦及仗馬於殿庭中途掌禮院官捧皇太子致詞函入置於案班首致詞函次之宮官各服黑團領就宮門外分左右相向北上諸陪衛之官各服其服詣閣奉迎禮貌官跪啓內嚴皇太子具翼善冠袞龍袍座內堂宮官先行四拜禮如常鼓二嚴近侍及諸護衛之官各服其服俱詣閣外伺候宗親文武應叅官及百官俱以黑團領就門外位禮貌官跪啓外備

皇太子乘輿以出鼓吹振作相禮前導至致中門外跪啓請降

輿 皇太子降輿鼓吹止相禮前導入次左掌禮詣閣外跪

奏中嚴 陛下具翼善冠黃袍御內殿繖扇侍衛如常儀

近侍及執事官先行四拜禮如常典樂帥工人入就位協

律郎入就舉麾位鼓三嚴執事官先就位主事分引宗親

文武三品以下應叅官及百官三品以下由東西偏門入

就拜位相禮跪啓請出次 皇太子出次西向立鼓聲止

闕內外門左掌禮跪奏外辦 陛下乘輿以出左右掌禮

前導繖扇侍衛如常儀 陛下將出仗動鼓吹振作將入

殿門協律郎俯伏舉麾興工鼓祝軒架作與民樂令鼓吹

止左掌禮跪奏請降輿 陛下降輿陞座爐烟升捧寶置

於案繖扇侍衛如常儀協律郎跪偃麾工憂敬樂止諸護

衛之官入列於 御座之後及殿內東西秘書院丞郎入

就位俯伏司禁分立於殿階上相禮導 皇太子由東門

入詣拜位 宮官應從入者跪於拜位東南西北上 主事引宗親文武二品以上由

東西偏門入就拜位軒架作步虛子令典儀曰四拜贊儀

唱鞠躬四拜興平身 皇太子鞠躬四拜興平身在位者

皆鞠躬四拜興平身樂止軒架作與民樂慢典膳司提調

進酒器樂止贊儀唱跪 皇太子跪在位者皆跪軒架作

與民樂令提調捧揮巾函詣座前跪奉侍跪進進匙楪樂

止典樂帥工人舞童陞就位登歌作順天開運之曲舞童

入作帝壽昌 原舞曲 提調進大卓進饌案進別行果樂止登

歌作長春不老之曲舞童入作佳人剪牧丹 原舞曲 近侍捧

花盤詣座前跪奉侍跪進樂止登歌作萬壽永無疆之曲

鄉唐交奏提調進鹽水樂止登歌作千年萬歲之曲舞童入作

鳳來儀原舞曲提調進小饗樂止贊儀唱俯伏興平身 皇

太子俯伏興平身在位者皆俯伏興平身樂師二人陞自

西階當中北向立唱萬年懽樂章訖退進第一爵相禮導

皇太子由正門相禮止於戶外入詣壽酒亭東北向立提調酌壽酒

鞠躬進 皇太子前 皇太子受爵詣座前贊儀唱跪

皇太子跪在位者皆跪 皇太子以爵授提調提調鞠躬

受爵跪進奉侍傳捧跪置于座前贊儀唱俯伏興平身

皇太子俯伏興平身在位者皆俯伏興平身 皇太子由

東門出相禮前導詣拜位贊儀唱跪 皇太子跪在位者

皆跪代致詞官陞自西偏階由正門入進當座前俯伏跪

讀訖俯伏興降復位承制宮秘書院丞進當座前俯伏跪奏宣

制俯伏興由東門出臨席西向立稱有制宣制曰稱觴之

辰與皇太子同慶登歌作壽曜南極之曲舞童入作獻

仙桃原舞曲陛下舉爵提調進受虛爵復於坵樂止贊儀唱

俯伏興平身皇太子俯伏興平身在位者皆俯伏興平

身贊儀唱跪皇太子跪在位者皆跪登歌作表正萬邦

之曲鄉唐交奏提調進湯兼進味數樂止登歌作天命有德之曲鄉唐

交奏提調進饅頭樂止登歌作天籙永昌之曲鄉唐交奏提調進

湯樂止登歌作壽齊天之曲鄉唐交奏提調進茶樂止贊儀唱

俯伏興平身皇太子俯伏興平身在位者皆俯伏興平

身相禮導皇太子就座進第二爵主事引班首陞自東

偏階主事止於階下由正門入詣壽酒亭東北向立提調酌壽酒授

班首班首受爵詣座前贊儀唱跪班首以下在位者皆跪

班首以爵授提調提調立受爵跪進奉侍傳捧跪置于座
 前贊儀唱俯伏興平身班首以下在位者皆俯伏興平身
 班首由西門出就拜位贊儀唱跪在位者皆跪代致詞官
 陞自西偏階由西門入進當座前俯伏跪讀訖俯伏興降
 復位承制官進當座前俯伏跪奏宣制俯伏興由東門出
 臨階西向立稱有制宣制曰敬舉卿等之觴登歌作風雲
 慶會之樂舞童入作初舞原舞陛下舉爵提調進受虛爵
 復於坵樂止登歌作緝熙純嘏之曲鄉唐提調進湯兼進
 樂止贊儀唱俯伏興平身在位者皆俯伏興平身相禮導
 皇太子還詣拜位贊儀唱跪皇太子跪在位者皆跪贊
 儀唱鞠躬三舞蹈皇太子鞠躬三舞蹈在位者皆鞠躬
 三舞蹈贊儀唱山呼皇太子拱手加額曰萬歲在位者

拱手加額曰萬歲唱山呼曰萬歲唱再山呼曰萬萬歲凡呼

萬歲樂工軍校齊聲應之軒架作步虛子令典儀曰四拜贊儀唱俯伏興

四拜興平身 皇太子俯伏興四拜興平身在位者皆俯

伏興四拜興平身樂止贊儀唱就位相禮導 皇太子就

座主事分引宗親文武應叅官各就位典樂引歌者及琴

瑟分東西偏階陞就位軒架作步虛子令典膳司副提調

捧揮巾函詣 皇太子前奉侍跪進進匙楪樂止登歌作

日重光之曲鄉唐交奏副提調進饌案進別行果樂止登歌作

萬年長春之曲舞童入作六花隊原舞曲宮官捧花盤詣

皇太子前跪奉侍跪進樂止登歌作海重潤之曲鄉唐交奏副

提調進鹽水樂止登歌作四海春之曲鄉唐交奏副提調進小

膳樂止副提調酌酒跪進奉侍傳捧跪置于 皇太子前

登歌作萬壽長樂之曲舞童入作演百福之舞原舞皇太

子受盞舉飲副提調進受虛盞復於酒亭樂止登歌作月

重輪之曲鄉唐副提調進湯兼進樂止登歌作山河玉曆

長之曲鄉唐副提調進饅頭樂止登歌作星重輝之曲鄉唐

奏交副提調進湯樂止登歌作喜千春之曲鄉唐副提調進

茶樂止執事者設宗親文武應叅官饌卓散花又散百官

花分花官分立於東西班頭以副提調酌酒跪進奉侍傳捧跪置

于皇太子前登歌作堯天舜日之曲舞童入作萬壽舞

原舞皇太子受盞舉飲副提調進受虛盞復於酒亭樂止

登歌作景籙無疆之曲鄉唐副提調進湯兼進樂止執事

者設宗親文武應叅官湯進第三爵主事引進爵宰臣由

正門入詣壽酒亭東北向立提調酌壽酒授宰臣宰臣受

爵詣座前跪宗親文武應叅官以下離位俯伏進罷還位凡進湯時同後做此

宰臣以爵授提調提調立受爵跪進奉侍傳捧跪置于座

前 陛下執爵宰臣俯伏登歌作致和平之曲舞童入作

牙拍舞原舞 陛下舉爵提調進受虛爵立授宰臣宰臣受

復於酒亭樂止登歌作吉祥之曲鄉唐 提調進湯兼進 樂

止宰臣由西門後做 出就位副提調酌酒跪進奉侍傳捧

跪置于 皇太子前登歌作於萬斯年之曲鄉唐 皇太子

受盞舉飲副提調進受虛盞復於酒亭樂止登歌作承華

之曲鄉唐 副提調進湯兼進 樂止執事者行宗親文武應

叅官酒行百官宣醞凡賜酒初至在位者離位俯伏跪受飲訖俯伏興還位 進第四爵主事

引進爵宰臣由正門入詣壽酒亭東北向立提調酌壽酒

授宰臣宰臣受爵詣座前跪授提調提調立受爵跪進奉

侍傳捧跪置于座前 陛下執爵宰臣俯伏登歌作海屋

添籌之曲舞童入作夢金尺原舞陛下舉爵提調進受虛

爵立授宰臣宰臣受復於酒亭樂止登歌作應天長之曲

鄉唐提調進湯兼進樂止宰臣還就位副提調酌酒跪進

奉侍傳捧跪置于 皇太子前登歌作瑞雲曜日之曲鄉唐

交皇太子受盞舉飲副提調進受虛盞復於酒亭樂止登

歌作豐康之曲鄉唐副提調進湯兼進樂止執事者行宗

親文武應叅官酒行百官宣醞進第五爵主事引進爵宰

臣由正門入詣壽酒亭東北向立提調酌壽酒授宰臣宰

臣受爵詣座前跪授提調提調立受爵跪進奉侍傳捧跪

置于座前 陛下執爵宰臣俯伏登歌作慶豐年之曲舞

童入作慶豐圖原舞陛下舉爵提調進受虛爵立授宰臣

宰臣受復於酒亭樂止登歌作岡陵之曲鄉唐交奏提調進湯

兼進味數樂止宰臣還就位副提調酌酒跪進奉侍傳捧跪置

于皇太子前登歌作樂千秋之曲鄉唐交奏皇太子受盞舉

飲副提調進受虛盞復於酒亭樂止登歌作永南山之曲

鄉唐交奏副提調進湯兼進味數樂止執事者行宗親文武應叅官

酒行百官宣醞進第六爵主事引進爵宰臣由正門入詣

壽酒亭東北向立提調酌壽酒授宰臣宰臣受爵詣座前

跪授提調提調立受爵跪進奉侍傳捧跪置于座前陛

下執爵宰臣俯伏登歌作天下太平之曲舞童入作拋毬

樂原舞曲陛下舉爵提調進受虛爵立授宰臣宰臣受復於

酒亭樂止登歌作萬方寧之曲鄉唐交奏提調進湯兼進味數樂止

宰臣還就位副提調酌酒跪進奉侍傳捧跪置于皇太

子前登歌作壽延長之曲交奏皇太子受盞舉飲副提調

進受虛盞復於酒亭樂止登歌作嘉樂之曲交奏副提調

進湯兼進味數樂止執事者行宗親文武應叅官酒行百官宣

醞進第七爵主事引進爵宰臣由正門入詣壽酒亭東北

向立提調酌壽酒授宰臣宰臣受爵詣座前跪授提調提

調立受爵跪進奉侍傳捧跪置于座前陛下執爵宰臣

俯伏登歌作聖人無憂之曲舞童入作長生寶宴之舞發

陛下舉爵提調進受虛爵立授宰臣宰臣受復於酒亭

樂止登歌作泰寧之曲交奏提調進湯兼進味數樂止宰臣還

就位副提調酌酒跪進奉侍傳捧跪置于皇太子前登

歌作賀离明之曲交奏皇太子受盞舉飲副提調進受虛

盞復於酒亭樂止登歌作乾坤泰之曲交奏副提調進湯

兼進
宋數

樂止執事者行宗親文武應叅官酒行百官宣醞進

第八爵主事引進爵宰臣由正門入詣壽酒亭東北向立

提調酌壽酒授宰臣宰臣受爵詣座前跪授提調提調立

受爵跪進奉侍傳捧跪置于座前 陛下執爵宰臣俯伏

登歌作祝聖人之曲舞童入作響鈴舞 原舞 陛下舉爵提

調進受虛爵立授宰臣宰臣受復於酒亭樂止登歌作日

月光華之曲 鄉唐 提調進湯 兼進 樂止宰臣還就位副提

調酌酒跪進奉侍傳捧跪置于 皇太子前登歌作演百

福之曲 鄉唐 皇太子受盞舉飲副提調進受虛盞復於酒

亭樂止登歌作醉豐亨之曲 鄉唐 副提調進湯 兼進 樂止

執事者行宗親文武應叅官酒行百官宣醞進第九爵主

事引進爵宰臣由正門入詣壽酒亭東北向立提調酌壽

酒授宰臣宰臣受爵詣座前跪授提調提調立受爵跪進

奉侍傳捧跪置于座前 陛下執爵宰臣俯伏登歌作五

雲開瑞朝舞童入作舞鼓原舞陛下舉爵提調進受虛爵

立授宰臣宰臣受復於酒亭樂止登歌作瑞日和之曲唐

奏提調進湯兼進樂止宰臣還就位副提調酌酒跪進奉

侍傳捧跪置于 皇太子前登歌作日升月恆之曲鄉唐

皇太子受盞舉飲副提調進受虛盞復於酒亭樂止登歌

作萬歲春之曲鄉唐副提調進湯兼進樂止登歌作天保

九如之曲舞童入作四仙舞原舞提調進大膳樂止登歌

作箕疇五福之曲鄉唐副提調進大膳于 皇太子前樂

止執事者行宗親文武應叅官酒行百官宣醞陛下若入小次

戶外立宗親及羣臣陸殿內及階上者分東西階下立其位於殿庭者皆 酒行九

出位立 陛下出陸座俱還就位 皇太子出入時宗親及羣臣亦如之

遍登歌作天香鳳韶之曲舞童入作壽延長原舞曲提調退

揮巾退匙櫟撤饌案副提調退 皇太子揮巾退匙櫟撤

饌案樂止執事者撤宗親文武應叅官及百官卓宗親以下各以青紙

收裏饌餘自持而出贊儀唱可起主事分引宗親文武應叅官及百官

還復拜位相禮導 皇太子還就拜位軒架作步虛子令

贊儀唱鞠躬四拜興平身 皇太子鞠躬四拜興平身在

位者皆鞠躬四拜興平身樂止左掌禮陞自西偏階由西

門入進當座前俯伏跪奏禮畢贊儀唱禮畢協律郎跪俯

伏舉麾興工鼓祝軒架作與民樂令左掌禮跪奏請降座

乘輿 陛下降座乘輿織扇侍衛如常儀將出殿門鼓吹振作

協律郎跪偃麾俯伏興工戛敵樂止 陛下還內鼓吹止相

禮跪啓請乘輿 皇太子乘輿鼓吹振作織扇陪衛如來儀相

禮前導還內止鼓吹主事分引宗親文武應叅官及百官出

左掌禮跪奏解嚴奉旨放仗

咸寧殿內進宴儀

其日尚寢帥其屬設 陛下座於咸寧殿北壁南向寶案

於座東香案二於殿外左右又設大次於殿之東閣女執

事設 皇太子侍坐位於簾外東階上近東西向女官設

皇太子妃侍坐位於殿內近西東向女執事設 親王侍

位於東階上近東西向女執事設 皇太子致詞案於簾

外東階上女官設 皇太子妃致詞案於簾內西階上女

執事設 親王致詞案於東階上稍退於皇太子致詞案 教坊司備樂

陳呈才舞於殿之南階上設女執事舉麾位於殿之西階

上近西東向典賓設都夫人左右命婦侍位於簾內東西

階上北向女執事陳儀仗於殿門外及簾外階上東西如常女執事設 皇太子褥位於簾外當中北向女官設

皇太子妃褥位於簾內西階上近西北向女執事設 親

王拜位於南階上典賓設郡夫人左右命婦拜位於楹外

簾內分東西俱近南北向女官設 皇太子 皇太子妃

進爵褥位於楹內當中北向女執事設 親王進爵位於

楹外簾內近東北向典賓設郡夫人左右命婦進爵位於

楹外簾內近西北向女執事設宗親進爵位於簾外西階

上近南北向又設宗親戚臣進宴廳堂上郎廳拜位於致

中門內東西階上北向又設 皇太子小次於咸寧殿近

地隨地之宜近東西向女官設 皇太子妃便次於咸寧殿西

階上隨地之宜司贊尚正典賓典言典贊位於簾內階上左右

在南差退俱北上相向設贊唱司唱女執事位於簾外階

上左右在南差退俱北上相向尚食設壽酒亭及茶亭於

簾內東階上女執事設進花兼揮巾卓於簾外東階上又

設皇太子酒亭及茶亭進花兼揮巾卓於簾外東階上

女官設皇太子妃酒亭及茶亭進花兼揮巾卓於簾內

西階上女執事設親王酒卓及頌花卓於簾外東階上

典飾設郡夫人左右命婦酒卓及致詞案於簾內階上東

西俱近南頌花卓於簾內近南女官頌花兼設女執事設宗親戚臣

酒卓及致詞案頌花卓於簾外東階上近南進宴廳堂上郎廳酒卓及頌花卓兼

設又工伶頌花兼設進宴廳堂上郎廳陪皇太子致詞函皇太子

妃致詞函親王郡夫人左右命婦宗親戚臣致詞隨後網仗鼓吹前導至致中門外請

尚傳以入各置於案前三刻女官俱詣內閣伺候前二刻

女執事引宗親戚臣進宴廳堂上郎廳各服黑團領入就外位典

賓引郡夫人左右命婦各具禮服入就外位女執事引親王

具雙童髻空頂幘袞龍袍入就外位守閨詣皇太子妃閣外跪啓請內

嚴少頃又啓外備皇太子妃加首飾具翟衣以出守閨

前導入便次女執事詣皇太子閣外跪啓請內嚴少頃

又啓外備皇太子具翼善冠袞龍袍以出女執事前導

入小次前一刻尚宮詣陛下閣外跪奏請中嚴少頃又

奏外辨陛下具翼善冠黃袍以出尚宮前導入大次時

至女執事引宗親戚臣進宴廳堂上郎廳入就拜位典賓

引郡夫人左右命婦入就拜位女執事俯伏舉麾奏康樂

之曲洛陽春女執事引親王入就拜位樂止守閨詣皇

太子妃便次前跪啓請出次行禮女執事俯伏舉麾奏慶

太平之曲

步虛子令

女官前導入詣褥位北向立

繖扇陪衛分左右

樂止

女執事詣

皇太子小次前跪啓請出次行禮女執事俯

伏舉麾奏箕疇五福之曲

步虛子令

女執事前導入詣簾外褥

位北向立

繖扇陪衛分左右

樂止尚宮跪奏禮儀既備請出次尚宮

導

陛下以出女執事俯伏舉麾奏膺天開運之曲呈鳳

來儀

原舞曲

樂止女執事俯伏舉麾奏天子萬年之曲鄉唐交奏

尚宮導

陛下陞座爐烟升捲簾繖扇侍衛如常儀樂止

司唱二人分東西唱廣運一章女執事俯伏舉麾奏天命

有德之曲

步虛子令

司贊曰四拜典贊唱鞠躬四拜興平身

皇太子

皇太子妃鞠躬四拜興平身親王郡夫人左

右命婦宗親戚臣進宴廳堂上郎廳鞠躬四拜興平身樂

止女執事俯伏舉麾奏頌九如之曲

鄉唐交奏

進第一爵女執

事導 皇太子詣簾外女官承導詣 陛下座前典贊唱

跪 皇太子 皇太子妃跪 親王郡夫人左右命婦宗

親戚臣進宴廳堂上郎廳跪樂止尚食奉爵鞠躬進 皇

太子前 皇太子受爵俯伏興在位者同女官導 皇太子詣

壽酒亭尚食進受爵復於壽酒亭女官導 皇太子出簾

外女執事前導還就褥位典贊唱跪 皇太子 皇太子

妃跪 親王郡夫人左右命婦宗親戚臣進宴廳堂上郎

廳跪女執事俯伏舉麾奏壽延長之曲鄉唐交奏女執事奉揮

巾函跪進于 皇太子前 皇太子受函還授女執事女

執事以受奉于簾外尚食傳捧跪進于 陛下座前進匙

楪凡進饌進味數等時兼進單子擎奉止於簾外女官傳捧進于饌案下做此樂止女執事俯伏舉麾奏景

籙無疆之曲鄉唐交奏女執事擎奉 御饌于簾外尚食以受

進于 陛下座前樂止女執事俯伏舉麾奏八千為春之

曲鄉唐 典贊唱進花尚飾進 陛下花樂止典贊唱俯伏

興平身 皇太子 皇太子妃俯伏興平身 親王郡夫

人左右命婦宗親戚臣進宴廳堂上郎廳俯伏興平身女

執事俯伏舉麾奏長春不老之曲鄉唐 女執事進 皇太

子花女官進 皇太子妃花樂止女執事俯伏舉麾奏喜

新春之曲鄉唐 樂止典贊唱頌花女執事頌 親王花典

飾頌郡夫人左右命婦花女執事頌宗親戚臣進宴廳堂

上郎廳花司唱二人分東西唱先唱樂章訖女執事俯伏

舉麾奏表正萬邦之曲鄉唐 女執事導 皇太子詣簾外

女官承導詣壽酒亭尚食開尊蓋以勺酌酒盛於瓶以瓶

取酒於爵鞠躬進 皇太子前 皇太子跪受爵詣 陛

下座前典贊唱跪 皇太子 皇太子妃跪 親王郡夫

人左右命婦宗親戚臣進宴廳堂上郎廳跪 皇太子以

爵授尚食尚食受爵跪進于 陛下座前進味數典贊唱

俯伏興平身 皇太子 皇太子妃俯伏興平身 親王

郡夫人左右命婦宗親戚臣進宴廳堂上郎廳俯伏興平

身女官導 皇太子出簾外女執事前導還就褥位樂止

典贊唱跪 皇太子 皇太子妃跪 親王郡夫人左右

命婦宗親戚臣進宴廳堂上郎廳跪代致詞女執事進當

簾外北向跪讀訖 致詞還置於案下做此 女執事俯伏舉麾奏壽耀南

極之曲呈獻仙桃 原舞 陛下舉爵尚食進受虛爵復於壽

酒亭典贊唱俯伏興平身 皇太子 皇太子妃俯伏興

平身 親王郡夫人左右命婦宗親戚臣進宴廳堂上郎

廳俯伏興平身樂止典贊唱跪 皇太子 皇太子妃跪

親王郡夫人左右命婦宗親戚臣進宴廳堂上郎廳跪尚

宮進當榻下跪承傳旨俯伏興出楹外簾內西向立稱有

旨宣旨曰稱觴之辰與 皇太子同慶典贊唱俯伏興平

身 皇太子 皇太子妃俯伏興平身 親王郡夫人左

右命婦宗親戚臣進宴廳堂上郎廳俯伏興平身女執事

導 皇太子就簾外西向座女執事俯伏舉麾奏於萬斯

年之曲 鄉唐交奏 尚食進鹽水樂止女執事俯伏舉麾奏祝天

保之曲 鄉唐交奏 女執事擎奉小膳于簾外尚食以受進于

陛下座前樂止女執事俯伏舉麾奏千年萬歲之曲 鄉唐交奏

尚食進湯樂止女執事俯伏舉麾奏聖人無虞之曲 鄉唐交奏

尚食進大膳樂止女執事俯伏舉麾奏祈天永命之曲 鄉唐交奏

交奏

尚食進饅頭樂止女執事俯伏舉麾奏吉安之曲

鄉唐交奏

進第二爵女官導

皇太子妃詣

陛下座前典贊唱跪

皇太子妃跪

親王郡夫人左右命婦宗親戚臣進宴廳

堂上郎廳跪樂止尚食奉爵鞠躬進

皇太子妃前 皇

太子妃受爵俯伏興

者在位者同

女官導

皇太子妃詣壽酒亭

尚食進受爵復於壽酒亭女官導

皇太子妃還就褥位

女執事俯伏舉麾奏呈祥之曲

鄉唐交奏

女官導

皇太子妃

詣壽酒亭尚食開尊蓋以勺酌酒盛於瓶以瓶取酒於爵

鞠躬進

皇太子妃前

皇太子妃跪受爵詣

陛下座

前典贊唱跪

皇太子妃跪

親王郡夫人左右命婦宗

親戚臣進宴廳堂上郎廳跪

皇太子妃以爵授尚食尚

食受爵跪進于

陛下座前進味數典贊唱俯伏興平身

皇太子妃俯伏興平身 親王郡夫人左右命婦宗親戚

臣進宴廳堂上郎廳俯伏興平身女官導 皇太子妃還

就褥位樂止典贊唱跪 皇太子妃跪 親王郡夫人左

右命婦宗親戚臣進宴廳堂上郎廳跪代致詞女官進當

榻前北向跪讀訖女執事俯伏舉麾奏瑞雲曜日之曲呈

帝壽昌原舞曲 陛下舉爵尚食進受虛爵復於壽酒亭典贊

唱俯伏興平身 皇太子妃俯伏興平身 親王郡夫人

左右命婦宗親戚臣進宴廳堂上郎廳俯伏興平身樂止

典贊唱跪 皇太子妃跪 親王郡夫人左右命婦宗親

戚臣進宴廳堂上郎廳跪尚宮進當榻下跪承傳旨俯伏

興出臨階西向立稱有旨宣旨曰稱觴之辰與 皇太子

妃同慶典贊唱俯伏興平身 皇太子妃俯伏興平身

親王郡夫人左右命婦宗親戚臣進宴廳堂上郎廳俯伏

與平身女官導 皇太子妃就簾內東向座女執事俯伏

舉麾奏天籙永昌之曲鄉唐交奏 尚饌進茶于 陛下座前尚

食傳捧置于茶亭樂止女執事俯伏舉麾奏壽千春之曲

鄉唐交奏 女執事奉揮巾進于 皇太子前進匙楪女官奉揮

巾進于 皇太子妃前進匙楪樂止女執事俯伏舉麾奏

萬壽長樂之曲呈夢金尺原舞曲 女執事奉饌果之案進于

皇太子前女執事奉饌果案于簾外女官以受進于 皇

太子妃前樂止女執事俯伏舉麾奏祝華之曲鄉唐交奏 進第

三爵女執事引 親王詣簾外尚正承引詣楹外進爵位

典贊唱跪 親王跪樂止尚食奉爵以授 親王 親王

受爵以授尚饌尚饌受爵復於壽酒亭典贊唱俯伏興平

身 親王俯伏興平身女執事俯伏舉麾奏瑤桃春之曲

鄉唐交奏 典贊唱跪 親王跪尚食開尊蓋以勺酌酒盛於瓶

以瓶取酒於爵以授尚饌尚饌受之以授 親王 親王

跪受爵還授尚饌尚饌受之以授尚食尚食受爵跪進于

陛下座前進味數樂止典贊唱俯伏興平身 親王俯伏

興平身尚正引 親王出簾外女執事前引還復拜位典

贊唱跪 親王跪代致詞女執事進當簾外北向跪讀訖

女執事俯伏舉麾奏麟趾毓慶之曲呈壽延長原舞曲 陛下

舉爵尚食進受虛爵復於壽酒亭典贊唱俯伏興平身

親王俯伏興平身樂止典贊唱跪 親王跪尚宮進當榻

下跪承傳旨俯伏興出楹外簾內當中南向立稱有旨宣

旨曰稱觴之辰與 親王同之典贊唱俯伏興平身 親

王俯伏興平身女執事俯伏舉麾奏凝安之曲

交鄉唐

進第

四爵典賓引郡夫人就進爵位典贊唱跪郡夫人跪樂止

尚食奉爵授郡夫人郡夫人受爵以授尚饌尚饌受爵復

於壽酒亭典贊唱俯伏興平身郡夫人俯伏興平身女執

事俯伏舉麾奏豐慶之曲

交鄉唐

典贊唱跪郡夫人跪尚食

開尊蓋以勺酌酒盛於瓶以瓶取酒於爵以授尚饌尚饌

受之以授郡夫人郡夫人跪受爵還授尚饌尚饌受之以

授尚食尚食受爵跪進于

陛下座前進味數樂止典贊

唱俯伏興平身郡夫人俯伏興平身典賓引郡夫人還復

位典贊唱跪郡夫人跪代致詞女官進當榻前北向跪讀

訖女執事俯伏舉麾奏樂千秋之曲呈響鈴舞

原舞

陛下

舉爵尚食進受虛爵復於壽酒亭典贊唱俯伏興平身郡

夫人俯伏興平身樂止典贊唱跪郡夫人跪尚宮進當榻
 下跪承傳旨俯伏興出楹外簾內當中南向立稱有旨宣
 旨曰稱觴之辰與郡夫人同之典贊唱俯伏興平身郡夫
 人俯伏興平身女執事俯伏舉麾奏梅花引鄉唐交奏進第五
 爵典賓引左命婦班首就進爵位典贊唱跪左命婦班首
 以下跪樂止尚食奉爵授左命婦班首左命婦班首受爵
 以授尚饌尚饌受爵復於壽酒亭典贊唱俯伏興平身左
 命婦班首以下俯伏興平身女執事俯伏舉麾奏凝和之
 曲鄉唐交奏典贊唱跪左命婦班首以下跪尚食開尊蓋以勺
 酌酒盛於瓶以瓶取酒於爵以授尚饌尚饌受之以授左
 命婦班首左命婦班首跪受爵還授尚饌尚饌受之以授
 尚食尚食受爵跪進于 陛下座前進味數樂止典贊唱

俯伏興平身左命婦班首以下俯伏興平身典賓引左命婦班首還復位典贊唱跪左命婦班首以下跪代致詞女官進當榻前北向跪讀訖女執事俯伏舉麾奏永南山之曲呈寶相舞原舞陛下舉爵尚食進受虛爵復於壽酒亭典贊唱俯伏興平身左命婦班首以下俯伏興平身樂止典贊唱跪左命婦班首以下跪尚宮進當榻下跪承傳旨俯伏興出楹外簾內當中南向立稱有旨宣旨曰稱觴之辰與左命婦同之典贊唱俯伏興平身左命婦班首以下俯伏興平身女執事俯伏舉麾奏屢豐年之曲鄉席交奏進第六爵典賓引右命婦班首就進爵位典贊唱跪右命婦班首以下跪樂止尚食奉爵授右命婦班首右命婦班首受爵以授尚饌尚饌受爵復於壽酒亭典贊唱俯伏興平身

右命婦班首以下俯伏興平身女執事俯伏舉麾奏咸寧
之曲

鄉唐
交奏

典贊唱跪右命婦班首以下跪尚食開尊蓋以

勺酌酒盛於瓶以瓶取酒於爵以授尚饌尚饌受之以授
右命婦班首右命婦班首跪受爵還授尚饌尚饌受之以
授尚食尚食受爵跪進于

陛下座前進味數樂止典贊

唱俯伏興平身右命婦班首以下俯伏興平身典賓引右
命婦班首還復位典贊唱跪右命婦班首以下跪代致詞
女官進當榻前北向跪讀訖女執事俯伏舉麾奏五雲開
瑞朝呈佳人剪牧丹

原舞
曲

陛下舉爵尚食進受虛爵復於

壽酒亭典贊唱俯伏興平身右命婦班首以下俯伏興平

身樂止典贊唱跪右命婦班首以下跪尚宮進當榻下跪

承傳旨俯伏興出楹外簾內當中南向立稱有旨宣旨曰

稱觴之辰與右命婦同之典贊唱俯伏興平身右命婦班

首以下俯伏興平身女執事俯伏舉麾奏簾外花之曲唐

進第七爵女執事引宗親班首詣簾外進爵位典贊唱交奏

跪宗親班首以下跪樂止尚食奉爵以授尚饌尚饌受之

以授女執事女執事受之以授宗親班首宗親班首受爵

俯伏興在位者同還授女執事女執事受之奉于簾外尚饌受

之以授尚食尚食受爵復於壽酒亭女執事引宗親班首

還復位女執事俯伏舉麾奏瑞日和之曲唐女執事引交奏

宗親班首詣簾外進爵位典贊唱跪宗親班首以下跪尚

食開尊蓋以勺酌酒盛於瓶以瓶取酒於爵以授尚饌尚

饌受之以授女執事女執事受之以授宗親班首宗親班

首跪受爵還授女執事女執事受之奉于簾外尚饌受之

以授尚食尚食受爵跪進于 陛下座前進味數樂止典

贊唱俯伏興平身宗親班首以下俯伏興平身女執事引

宗親班首還復位典贊唱跪宗親班首以下跪代致詞女

執事進當簾外北向跪讀訖女執事俯伏舉麾奏祝有餘

之曲呈六花隊原舞曲陛下舉爵尚食進受虛爵復於壽酒

亭典贊唱俯伏興平身宗親班首以下俯伏興平身樂止

女執事引宗親班首詣簾外進爵位典贊唱跪宗親班首

以下跪尚宮進當榻下跪承傳旨俯伏興出楹外簾內當

中南向立稱有旨宣旨曰敬舉卿等之觴典贊唱俯伏興

平身宗親班首以下俯伏興平身女執事引宗親班首還

復位典贊唱跪戚臣班首以下跪代致詞女執事進當簾

外北向跪讀訖典贊唱俯伏興平身戚臣班首以下俯伏

興平身女執事俯伏舉麾奏昇平萬歲之曲唐鄉交奏女官導

皇太子妃還詣褥位女執事導 皇太子還詣褥位樂止

典贊唱跪 皇太子 皇太子妃跪 親王郡夫人左右

命婦宗親戚臣進宴廳堂上郎廳跪典贊唱鞠躬三舞蹈

皇太子 皇太子妃鞠躬三舞蹈 親王郡夫人左右命

婦宗親戚臣進宴廳堂上郎廳鞠躬三舞蹈典贊唱山呼

皇太子 皇太子妃拱手加額曰萬歲 親王郡夫人左

右命婦宗親戚臣進宴廳堂上郎廳拱手加額曰萬歲唱

山呼曰萬歲唱再山呼曰萬萬歲凡呼萬歲在位者齊聲應之女執事俯伏

舉麾奏萬世太平之曲步虛子令司贊曰四拜典贊唱俯伏興

四拜興平身 皇太子 皇太子妃俯伏興四拜興平身

親王郡夫人左右命婦宗親戚臣進宴廳堂上郎廳俯伏

興四拜興平身樂止女執事導 皇太子還就座女官導

皇太子妃還就座女執事引 親王就坐典賓引郡夫人

左右命婦就坐女執事引宗親戚臣進宴廳堂上郎廳就

坐女執事俯伏舉麾奏醉太平之曲鄉唐交奏樂止女執事設

親王饌床典膳宣郡夫人左右命婦饌床女執事宣宗親

戚臣進宴廳堂上郎廳饌床女執事俯伏舉麾奏海屋添

籌之曲呈萬壽舞原舞曲女執事導 皇太子詣簾外女官

承導詣 陛下座前典贊唱跪 皇太子跪女執事詣

皇太子酒亭以爵酌酒奉于簾外尚食以受跪進于 陛

下座前 陛下受之以授尚食尚食跪受爵鞠躬進 皇

太子前 皇太子受爵舉飲在位者離位鞠躬典贊唱俯伏興平身

皇太子執爵俯伏興平身女官導 皇太子出簾外女執

事承導至酒亭女執事跪受虛爵復於酒亭在位者還就位女執事

導 皇太子還就座進味數樂止女執事俯伏舉麾奏慶

萬年之曲呈獻天花原舞曲女官導 皇太子妃詣 陛下

座前典贊唱跪 皇太子妃跪女官詣 皇太子妃酒亭

以爵酌酒跪進于 陛下座前 陛下受之以授尚食尚

食跪受爵鞠躬進 皇太子妃前 皇太子妃受爵舉飲

在位者離位鞠躬典贊唱俯伏興平身 皇太子妃執爵俯伏興平

身女官導 皇太子妃至酒亭尚食跪受虛爵復於酒亭

在位者還就位女官導 皇太子妃還就座進味數樂止女執事俯

伏舉麾奏萬年長歡之曲鄉唐交奏女執事進鹽水于 皇太

子前女官進鹽水于 皇太子妃前樂止女執事俯伏舉

麾奏日升月恆之曲鄉唐交奏女執事進小膳于 皇太子前

女官進小膳于 皇太子妃前樂止女執事俯伏舉麾奏

重光之曲鄉唐又執事進湯于 皇太子前女官進湯于

皇太子妃前樂止女執事俯伏舉麾奏既壽永昌之曲鄉唐

交女執事進大膳于 皇太子前女官進大膳于 皇太

子妃前樂止女執事俯伏舉麾奏堯天舜日之曲鄉唐女

執事進饅頭于 皇太子前女官進饅頭于 皇太子妃

前樂止女執事俯伏舉麾奏樂萬年之曲呈演百福之舞

原舞女執事酌酒跪進于 皇太子前 皇太子受蓋舉

飲女執事進受虛蓋復於酒亭進味數樂止女執事俯伏

舉麾奏凝天香之曲呈四仙舞原舞女官酌酒跪進于

皇太子妃前 皇太子妃受蓋舉飲女官進受虛蓋復於

酒亭進味數樂止女執事俯伏舉麾奏壽星輝之曲呈舞

鼓原舞曲女執事酌酒跪進于皇太子前皇太子受盞

舉飲女執事進受虛盞復於酒亭進味數樂止女執事俯

伏舉麾奏凝祥之曲呈疊勝舞原舞曲女官酌酒跪進于

皇太子妃前皇太子妃受盞舉飲女官進受虛盞復於

酒亭進味數樂止女執事俯伏舉麾奏華封三祝之曲唐鄉

交奏女執事進茶于皇太子前女官進茶于皇太子妃

前樂止女執事俯伏舉麾奏八千春秋之曲唐鄉尚食進

別行果子唐鄉陛下座前樂止女執事俯伏舉麾奏萬億千

春之曲唐鄉女執事進別行果子皇太子前女官進別

行果子皇太子妃前樂止女執事行酒于親王典膳

行酒于郡夫人左右命婦離位跪受欲訖就坐女執事行酒于宗親戚

臣進宴廳堂上郎廳離位跪受飲訖就坐女執事設親王別行果典

膳宣郡夫人別行果司唱二人分東西唱後唱樂章訖女

執事俯伏舉麾奏金殿萬年歡之曲呈長生寶宴之舞

菩薩

疊尚食退 陛下饌果之案退匙櫟退揮巾女執事以受

退出樂止女執事俯伏舉麾奏九五康寧之曲呈拋毬樂

原舞女執事退 皇太子饌果之案退匙櫟退揮巾女官

退 皇太子妃饌果之案退匙櫟退揮巾女執事以受退

出樂止女執事撤 親王饌床典膳撤郡夫人左右命婦

饌床女執事撤宗親戚臣進宴廳堂上郎廳饌床典贊唱

可起女執事引宗親戚臣進宴廳堂上郎廳還就拜位典

賓引郡夫人左右命婦還就拜位女執事引 親王還就

拜位女官導 皇太子妃還詣褥位女執事導 皇太子

還詣褥位女執事俯伏舉麾奏萬波停息之曲呈船遊樂

原舞

司贊曰四拜典贊唱鞠躬四拜興平身 皇太子

皇太子妃鞠躬四拜興平身 親王郡夫人左右命婦宗

親戚臣進宴廳堂上郎廳鞠躬四拜興平身樂止尚宮跪

奏禮畢典贊唱禮畢尚宮跪奏請解嚴女執事奉旨放仗

尚宮跪奏請降座女執事俯伏舉麾奏武寧之曲呈劍器

舞原舞

尚宮導

陛下入大次降簾

繖扇侍衛止於大次外

樂止典贊

唱跪

皇太子跪女執事奉致詞函跪進于

皇太子前

皇太子受之以授女執事女執事跪受以授尚記典贊唱

俯伏興平身

皇太子俯伏興平身女執事進當褥位前

跪承令

皇太子今日敬陪致詞俯伏興訖女執事曰妾承令敬陪致詞

女執事俯伏興詣簾外傳于

女官

敬陪致詞

女官跪承令女官還詣簾內跪傳復令于女執

事典贊唱跪

皇太子跪女執事進當褥位前跪啓復令

云委承令敬陪致詞奉入訖復位

典贊唱俯伏興平身 皇太子俯伏興平身

典贊唱跪

皇太子妃跪女官奉致詞函跪進于 皇太

子妃前 皇太子妃受之以授尚記典贊唱俯伏興平身

皇太子妃俯伏興平身女官進當 皇太子妃前跪承令

皇太子妃令曰敬陪致詞女官俯伏興少退跪云謹承令敬陪致詞

女官還詣 皇太子妃前典贊唱

跪 皇太子妃跪女官進當 皇太子妃前跪啓復令 云謹

承令敬陪致詞奉入訖復位

典贊唱俯伏興平身 皇太子妃俯伏興平身

女執事俯伏舉麾奏萬年無疆之曲 步虛子令 女執事導 皇

太子出小次女官導 皇太子妃出便次樂止女執事俯

伏舉麾奏太平春之曲 洛陽春 女執事引 親王出樂止典

賓引郡夫人左右命婦出女執事引宗親戚臣進宴廳堂

上郎廳出

咸寧殿夜進宴儀

其日

進宴禮成後

陛下座位饌案及儀仗仍設

皇太子座位及

饌案仍設退

皇太子妃座位及饌案撤

親王郡夫人

左右命婦宗親戚臣進宴廳堂上郎廳位次及床卓懸燈

於殿內及簾外設紗籠燈於簾外階上左右

或懸或豎

又設燭

於殿內及簾外

每如成雙

撤女執事舉麾改設照燭麾

呈才儀仗及樂器風

物并仍用

女官女執事女伶工人等仍以其服各就位時至女

執事詣

皇太子小次前跪啓請內嚴少頃又啓外備前

一刻女執事詣小次前跪啓請出次行禮

皇太子仍具

翼善冠袞龍袍插花以出繖扇陪衛如常儀女執事俯伏

舉麾奏南極壽曜之曲呈夢金尺

原舞曲

女執事前導入詣

簾外褥位北向立

繖扇陪衛分左右

樂止尚宮詣大次前跪奏請出

次女執事俯伏舉麾奏金仙獻桃之曲呈獻天花原舞曲尚

宮導 陛下以出樂止女執事俯伏舉麾奏堯天舜日之

曲呈長生寶宴之舞菩薩變尚宮導 陛下陞座捲簾懸燈

樂止女執事俯伏舉麾奏天命維新之曲步虛子令司贊曰四

拜典贊唱鞠躬四拜興平身 皇太子鞠躬四拜興平身

樂止典贊唱跪 皇太子跪女執事俯伏舉麾奏無量壽

之曲鄉唐交奏進酒器女執事奉酒器于簾外尚食以受置于

壽酒亭樂止女執事俯伏舉麾奏春臺玉燭之曲鄉唐交奏女

執事奉揮巾函于簾外尚食傳捧跪進于 陛下座前進

匙楪樂止女執事俯伏舉麾奏太平萬歲之曲呈無昇舞

原舞曲女執事奉 御饌于簾外尚食以受進于 陛下座

前典贊唱俯伏興平身 皇太子俯伏興平身樂止司唱

二人分東西唱先唱樂章訖女執事俯伏舉麾奏天保九

如之曲鄉唐交奏女執事導皇太子詣簾外女官承導詣壽

酒亭北向立尚食酌酒于爵鞠躬進皇太子前皇太

子受爵詣陛下座前典贊唱跪皇太子跪皇太子

以爵授尚食尚食受爵跪進于陛下座前樂止典贊唱

俯伏興平身皇太子俯伏興平身女官導皇太子出

簾外女執事前導還詣褥位典贊唱跪皇太子跪代致

詞女執事進當簾外當中北向跪讀訖執拍女執事引歌

者陞階就坐女執事俯伏舉麾奏細吹作長生寶宴之樂

歌三章樂止歌者出女執事俯伏舉麾奏海屋添籌之曲呈

鶴舞蓮花臺舞原舞曲陛下舉爵尚食進受虛爵復於壽酒

亭樂止典贊唱俯伏興平身皇太子俯伏興平身典贊

唱跪 皇太子跪典贊唱鞠躬三舞蹈 皇太子鞠躬三

舞蹈典贊唱山呼 皇太子拱手加額曰萬歲唱山呼曰

萬歲唱再山呼曰萬萬歲 凡呼萬歲在位者齊聲應之 女執事俯伏舉麾奏

昌運頌之曲呈寶相舞 原舞 女執事進湯于簾外尚食以

受進于 陛下座前樂止典贊唱俯伏興平身 皇太子

俯伏興平身女執事導 皇太子還就座女執事俯伏舉

麾奏萬年長春之曲呈舞鼓 原舞 女執事進揮巾于 皇

太子前進匙楪女執事進饌盤樂止女執事俯伏舉麾奏

山河玉曆長之曲呈獻仙桃 原舞 女執事酌酒進于 皇

太子前樂止女執事俯伏舉麾奏萬歲長樂之曲 鄉唐 女

執事進湯于 皇太子前樂止女執事俯伏舉麾奏百福

攸同之曲 鄉唐 尚食進茶于 陛下座前樂止女執事俯

伏舉麾奏萬壽無疆之曲鄉唐交奏女執事進茶于皇太子

前樂止司唱二人分東西唱後唱樂章訖女執事俯伏舉

麾奏日升月恆之曲呈疊勝舞原舞尚食退陛下饌案

退匙櫟退揮巾女執事以受退出樂止女執事俯伏舉麾

奏瑤池蟠桃之曲呈春鶯囀原舞女執事退皇太子饌

盤退匙櫟退揮巾樂止女執事俯伏舉麾奏祝有餘之曲

鄉唐交奏樂止典贊唱可起女執事導皇太子還詣褥位女

執事俯伏舉麾奏萬波停息之曲呈船遊樂原舞司贊曰

四拜典贊唱鞠躬四拜興平身皇太子鞠躬四拜興平

身樂止尚宮跪奏禮畢典贊唱禮畢尚宮跪奏落燈尚宮

跪奏請解嚴女執事奉旨放仗尚宮跪奏請降座女執事

俯伏舉麾奏武寧之曲呈劍器舞原舞尚宮導陛下降

座還內降簾樂止女執事俯伏舉麾奏萬億千春之曲

步虛

命子女執事導皇太子出小次樂止

咸寧殿翌日皇太子會酌儀

翌日女官設皇太子座於咸寧殿北壁南向寶案於座

東香案二於殿外左右樽花排設仍用又設小次於東閣女官設命

婦拜位於簾內西階上近南北向又設命婦陪宴位於簾

內西階上近西東向典賓典膳司贊典贊位於簾內西階

上女執事設進宴廳堂上郎廳拜位於致中門內階上分

東西近南北向又設陪宴位於致中門內近東西向司唱

位於階上左右在南差退北上相向女執事設皇太子

酒亭茶亭進花兼揮巾卓於楹外東階上女官設命婦酒

卓於簾內西階上又設命婦以下頒花卓於簾內西階上

近南典賓設命婦致詞案於簾內西階上近西女執事設
進宴廳堂上郎廳致詞案於簾外東階上近東設進宴廳
堂上郎廳酒卓於簾外東階上又設進宴廳堂上郎廳頒
花卓於簾外東階上近東教坊司備樂陳呈才舞於簾外
東西階上設女執事舉麾位於簾外西階上近西東向前
二刻女官女執事女伶工人等各以其服就外位少頃各
就位前一刻女執事引進宴廳堂上郎廳各服黑團領就外位典
賓引命婦各具禮服就外位女執事詣閣外跪啓請內嚴少頃
又啓外備皇太子具翼善冠袞龍袍以出繖扇陪衛如
常儀女執事前導入小次繖扇陪衛止於小次外時至典賓引命婦入
就拜位女執事引進宴廳堂上郎廳入就拜位女執事詣
小次前跪啓請出次皇太子出次女執事俯伏舉麾奏

九五康寧之曲呈鳳來儀原舞曲女執事導皇太子陞座

爐烟升繖扇陪衛如常儀樂止女執事俯伏舉麾奏天晴

海晏之曲洛陽春司贊曰四拜典贊唱鞠躬四拜興平身命

婦及進宴廳堂上郎廳鞠躬四拜興平身樂止司唱二人

分東西唱先唱樂章訖女執事俯伏舉麾奏於萬斯年之

曲呈壽延長原舞曲女執事進揮巾樂止女執事俯伏舉麾

奏萬年長春之曲鄉唐交奏典贊唱進花女執事進花樂止典

贊唱頌花典飾頌命婦花女執事頌進宴廳堂上郎廳花

典賓引命婦就坐女執事引進宴廳堂上郎廳就坐女執

事俯伏舉麾奏祥雲曜日之曲呈舞鼓原舞曲女執事進匙

樑進饌案兼進單子之節如正日儀樂止女執事俯伏舉麾奏萬壽長樂

之曲鄉唐交奏女執事進爵進味數樂止女執事俯伏舉麾奏

海屋添籌之曲呈獻仙桃原舞 皇太子舉爵女執事進受

虛爵復於酒亭樂止女執事俯伏舉麾奏天保九如之曲

鄉唐 女執事進湯樂止典賓引命婦班首諸命婦 就拜位典

贊唱跪命婦班首以下跪代致詞女官進當簾內近西北

向跪讀訖女執事進當座前跪承令俯伏興退南向立稱

有令宣令曰千一之慶以讌嘉賓典贊唱俯伏興平身命

婦班首以下俯伏興平身女執事引進宴廳堂上郎廳班

首諸堂郎 入就南階上北向典贊唱跪進宴廳堂上郎廳班

首以下跪代致詞女執事進當座前北向跪讀訖女執事

跪承令俯伏興出臨階南向立稱有令宣令曰千一之慶

以讌嘉賓典贊唱俯伏興平身進宴廳堂上郎廳班首以

下俯伏興平身女執事引進宴廳堂上郎廳還就拜位女

執事俯伏舉麾奏祝聖人之曲鄉唐交奏樂止典贊唱跪命婦

及進宴廳堂上郎廳跪典贊唱三叩頭命婦及進宴廳堂

上郎廳三叩頭典贊唱山呼命婦及進宴廳堂上郎廳拱

手加額曰千歲唱山呼曰千歲唱再山呼曰千千歲凡呼千歲在位

者齊聲應之女執事俯伏舉麾奏賀离明之曲洛陽春司贊曰四拜

典贊唱俯伏興四拜興平身命婦及進宴廳堂上郎廳俯

伏興四拜興平身樂止典賓引命婦還就坐女執事引進

宴廳堂上郎廳還就坐女執事俯伏舉麾奏慶辰嘉會之

曲呈春鶯囀原舞曲典膳設命婦饌卓行酒女執事設進宴

廳堂上郎廳饌卓行酒樂止女執事俯伏舉麾奏八千春

秋之曲呈拋毬樂原舞曲女執事進茶樂止司唱二人分東

西唱後唱樂章訖女執事俯伏舉麾奏武寧之曲呈劍器

舞原舞女執事退饌案退匙楪退揮巾樂止典膳撤命婦

饌卓女執事撤進宴廳堂上郎廳饌卓女執事俯伏舉麾

奏天籙永昌之曲鄉唐交奏樂止典贊唱可起典賓引命婦就

拜位女執事引進宴廳堂上郎廳就拜位女執事俯伏舉

麾奏四方來賀之曲洛陽春司贊曰四拜典贊唱鞠躬四拜

興平身命婦及進宴廳堂上郎廳鞠躬四拜興平身樂止

女執事進當座前跪啓禮畢典贊唱禮畢女執事俯伏舉

麾奏萬波停息之曲呈船遊樂原舞女執事進當座前跪

啓請降座皇太子降座女執事前導還內樂止典賓引

命婦出女執事引進宴廳堂上郎廳出

感寧殿翌日皇太子夜讌儀

其日會酌皇太子座位及饌案仍設撤命婦位次及床卓

懸燈於殿之內外設紗籠燈於階上左右或懸又設燭於

殿內及階上東西每如撤女執事舉麾改設照燭麾呈才儀

器風物女官女執事女伶工人等仍以其服各就位時至女

執事引進宴廳堂上郎廳仍服入就拜位女執事詣小次

前跪啓請出次 皇太子仍具翼善冠袞龍袍插花以出

女執事俯伏舉麾奏箕疇五福之曲呈演百福之舞原舞

女執事導 皇太子陞座爐烟升繖扇陪衛如常儀樂止

女執事俯伏舉麾奏獻天壽之曲洛陽司贊曰四拜典贊

唱鞠躬四拜興平身進宴廳堂上郎廳鞠躬四拜興平身

樂止司唱二人分東西唱先唱樂章訖女執事引進宴廳

堂上郎廳就坐女執事俯伏舉麾奏日重光之曲鄉唐女

執事進揮巾進匙楪樂止女執事俯伏舉麾奏萬歲長樂

之曲呈響鈴舞原舞女執事進饌盤兼進單子之節如正日儀樂止女執

事俯伏舉麾奏金盤玉露之曲鄉唐奏女執事進爵樂止女

執事俯伏舉麾奏壽曜南極之曲呈萬壽舞原舞皇太子

舉爵女執事進受虛爵復於酒亭樂止女執事俯伏舉麾

奏月重輪之曲鄉唐奏女執事進湯樂止女執事引進宴廳

堂上郎廳班首諸堂郎隨後入就南階上北向典贊唱跪進宴廳

堂上郎廳班首以下跪代致詞女執事進當座前北向跪

讀訖典贊唱俯伏興平身進宴廳堂上郎廳班首以下俯

伏興平身女執事引進宴廳堂上郎廳還就拜位典贊唱

跪進宴廳堂上郎廳跪典贊唱三叩頭進宴廳堂上郎廳

三叩頭典贊唱山呼進宴廳堂上郎廳拱手加額曰千歲

唱山呼曰千歲唱再山呼曰千歲凡呼千歲在位者齊聲應之女執事俯

伏舉麾奏碧嵩萬歲之曲洛陽春司贊曰四拜典贊唱俯伏

興四拜興平身進宴廳堂上郎廳俯伏興四拜興平身樂

止女執事俯伏舉麾奏星重輝之曲鄉唐交奏女執事進茶樂

止女執事引進宴廳堂上郎廳就坐女執事俯伏舉麾奏

萬波停息之曲呈船遊樂原舞曲女執事設進宴廳堂上郎

廳饌卓行酒樂止司唱二人分東西唱後唱樂章訖女執

事俯伏舉麾奏海重潤之曲呈壽延長原舞曲女執事退饌

盤退匙楪退揮巾樂止女執事撤進宴廳堂上郎廳饌卓

女執事俯伏舉麾奏長春不老之曲鄉唐交奏樂止典贊唱可

起女執事引進宴廳堂上郎廳還就拜位女執事俯伏舉

麾奏祝有餘之曲洛陽春司贊曰四拜典贊唱鞠躬四拜興

平身進宴廳堂上郎廳鞠躬四拜興平身樂止女執事進

當座前跪啓禮畢典贊唱禮畢女執事跪啓落燈女執事
俯伏舉麾奏金殿萬年歡之曲呈慶豐圖原舞曲女執事進
當座前跪啓請降座 皇太子降座女執事前導還內樂
止女執事引進宴廳堂上郎廳出

進宴儀軌卷之一



